

新會馮平山先生七十壽言彙錄

溫肅題

馮平山先生七十壽言彙錄目次

序言

影片

馮平山先生玉照

禮堂攝影

會客室攝影

圖書室攝影

一

來賓攝影

茶會攝影

戚友惠贈器物攝影

戚友惠贈圖畫攝影

壽言

壽序

頌詞

詩歌

馮平山先生七十壽言彙錄目次

一

馮平山先生七十壽言彙錄目次

填詞

聯語

讚語

附錄

馮平山先生七秩榮壽徵文啓

馮平山先生事略

馮平山先生七秩榮壽受禮知啓

敬領戚友隆禮撥捐各慈善機關一覽

馮平山先生七十壽言彙錄序

吾友馮公平山。以篤於爲善。致履高壽。今年屆古稀。乃以仲秋之日。稱觴於家。邦人諸友。與公有平生之雅者。莫不躋堂介壽。貢以徽言。咸推本於公之積德行義。用以獲福延壽。如響斯應。此足以見公之盛德在人。傳之鄉邦。有榮施矣。顧公自視。歆然不營虛譽。雖邦人士之稱道盛德。琳瑯璀璨。盈箱累篋。亦惟拾襲珍藏。傳之其家。不欲宣揚以來。標榜之誚也。余忝在知舊。以爲審若是。是邦人士之文。足以傳公於鄉邦後世者。而公顧深自韜抑。不聽

其傳。雖行善以陰。慮無以資觀感。夫昔人之爲文以傳人者。匪獨傳人。抑將藉人以傳其文也。然則公之受人徽言。盈箱累篋。與其傳之家。孰若使之並以人傳乎。公不能奪。爰取邦人諸友之壽言。彙而輯之。爲文者三十一。爲頌者一十四。爲詩者七十六。爲詞者一。爲聯者八十七。爲讚者一十三。凡二百二十有二首。都爲一篇。俾付剞劂云。


民國十八年十一月一日周壽臣謹序

馮平山先生玉照



平山先生像贊

嶺表間氣。篤生名流。中有耆英。岡州居遊。
天賦異稟。幼而歧嶷。學無常師。古訓是式。
惟公溫雅。器識純素。藹藹仁慈。愔愔軌度。
計然七策。范蠡三致。楠樹凌空。金玉自至。
聿追先德。市義輕財。積而能散。栽者是培。
萬間廣廈。鬻舍橫經。實拜公賜。永鐫公名。
令德令聞。乃歌乃賡。史臣載筆。紀茲頌聲。



禮 堂



會 客 室




室 書 圖



(一) 賓 來



(二) 賓 來



(一) 會 茶



(二) 會 茶



戚 友 惠 贈 器 物

恭題

平山世伯大人七來大康

岡州之英 嶺海蜚聲

運川發軔 富福莫京

博施濟眾 馳譽華夷

藝善公益 提學設施

公園林立 澤及桑梓

學校圖書 榮盡先美

行道有福 壽禾有艾

積善餘慶 其後必大

世孫陳冠卿等恭頌

順邑呂外其敬書

百福壽



(二) 畫圖贈惠友戚

黃金百萬
 育其才
 館貯圖書
 福地朋
 富壽康強
 長好施
 震騰遙祝
 詠畫采

百壽圖

平山仁光先生八袞開一榮壽大慶











乙巳中秋弟韓翔宸偕弟子元敬祝

(四) 畫圖贈惠友戚

馮平山先生七十壽言

壽序

書曰。惠迪吉。論語曰。仁者壽。自古膺大年。負盛名之士。必其仁以治己。惠以濟衆。而後有強固之精神。彪炳之事業者也。我平山先生。樂善好施。寰宇仰其仁矣。捐資興學。士林被其惠矣。以此爲公祝。公之德足以副之。雖然。有其本焉。本何在。心是也。公之心好善。而後能善與人同。公之心好學。而後能學如不及。其待人也。和霽可親。則其心之樂易可知也。其律己也。謹嚴不苟。則其心之敬慎可知也。一念



之慈祥。願登斯民於仁壽。寸衷之豈弟。冀進一世於平康。蓋公之德。皆由其本原而來。如火之然。如泉之達。其積累推施。有不期然而自然者。則期頤之徵。如操左券矣。矧芝蘭挺秀。杞梓儲材。後起之英。方興未艾。公當顧而樂之。則今日之壽。正如百仞之初基。千尋之肇點。當此蟾圓桂馥之候。躋公堂而晉祝。斯不禁歡欣鼓舞。爲之頌禱無窮者。也是爲序。

愚弟周壽臣羅旭餘曹善允李右泉周東生郭少鑿梁燕

蓀梁季典陳廉伯傅翼鵬胡禧堂岑伯銘馬永燦黃炳耀

盧頌舉黃金福黎金發周雨亭李星衢李佐臣胡恆錦世

愚姪周峻年梁弼予謝家寶譚雅士李海東江筱呂江貽

孫王德光容子名莫應。灌姚得中魯郝李香谷周頌朋劉
德譜鍾茂豐謝逸芻藍拔羣余元福黃凱吉李伯賢愚弟

左需撰書

貨殖而致巨富。矍鑠而屆遐齡。此人情之所榮。而今
昔之所同也。施諸人者厚其惠。行於己者逃其名。此
人情之所難。而今昔之所崇也。馮公平山可謂兼
之矣。公之行誼。僑港者類皆耳熟能詳。今歲秋八
月。爲公七秩攬揆之辰。海內外諸儒宗詞伯。凡所
以爲公壽者。紀頌翔實。纖巨靡遺。於此而予欲張
盛德。揚有功。是猶舉拳石勺水之微。而窺泰山黃河
之量也。不亦隘乎。故不具道。雖然。公友於予。且因

予而及於人者。其高風亮德。可以勵末俗而示來茲。此而不傳。殆無以爲我。公家乘拾遺之備。抑亦表彰文獻之謂何。予雖不敏。請言其略。民國六年。予始獲識公。或相過從。亦卒卒無須臾之間。得竭志意。八年。予商業狀況。幾頻於殆。公毅然詣予。出巨金入股。顧改組甫竟。以失人。不期年而資罄。予方引咎自訟。公怡怡無怨言。且推懷投款。若瀝肺肝。終不以得失而遽易初志。由是信益專。誼益密。夫人之相處。貴相知心。晚近論交。當其利之所在。則飲食徵逐。言笑晏晏。既親且暱矣。一旦利盡。詬尤隨之。卽不然。

亦將去之若浼。其能原情略跡。推誠致力。肫肫然。亟
亟然。挺起而爲將伯之助。一若處家人骨肉間者。求
之古昔。是千百中之幾何人。而况叔季之末乎。無何。
予復有籌建華人行之舉。繼又組織公民儲積公司。
暨肇安榮置業公司。連歲經營。猶克自固吾圉。而
公實先後力促其成。且投置巨資以爲之倡。公之
友予者如此。十三年。港政府簡予署華人代表。歷四
月。將真除時。予商業方更始。懼以事牽。行乞休矣。
公聞之。與李公右泉入見曰。民事不可緩也。兩利不
竝。則輕重權之。舍億兆僑衆而斤斤然爲吾儕二三

人謀可乎。且人皆企踵矚目以待子。謂子將可以立言也。子將焉往。予遂拜命。公司營業。兩公慨然分任之。五載以還。予獲從諸君子之後。以奔走効命於我父老昆弟者。兩公間接之力也。公好施與。捐輸之繁。達六七十萬。就予所躬與其大者言之。十三年。香港大學監督告予以經費絀甚。屬謀之。予趨公請五萬金。略道意。立予無吝容。且益其數。趣予反命。公又嘗與李公右泉商於予。請政府建設貧兒工藝院。願以巨款相助。爲茲院基。將報可矣。而工潮暴至。今事雖暫寢。公固未嘗一日去諸懷也。公

之因子而及於人者又如此。不寧惟是。予觀公爲人。剛毅木訥。其卹貧興學也。力任艱巨。終未嘗一居其名。或以自伐。夫功不必自我立。而善可以與人同者。此讓德之至。君子以爲難也。吾聞之。大德者必得其壽。又曰。作善降之百祥。公今享年七十。而筋力柔強。精爽不昧。望之若五十許人。以此而臻耄耋。介期頤。猶拾級而升也。其喆嗣秉華秉芬等。皆以華年蜚聲士林。且好學孜孜。惟恐不及。積善之後。必大天其殆。將啟諸詩曰。樂只君子。福履綏之。願與一般善信人。玉卮盛酒。以祝萬年也。

羅旭龢撰書

馮平山先生。吾夙所稱以聖賢之志。爲商賈之業。人咸以爲知言者。今己巳秋。爲其七十懸弧慶辰。島居人士。屬吾爲文以爲壽。顧先生性敦朴。不喜諛。尤厭末世徵逐浮文。峻却之。吾譬之曰。文人揚芬述德。非徒爲一人延譽。欲藉賢者行誼。以之風世而勵俗。亦猶先生廣播格言之旨耳。始領之。吾乃得濡毫醜墨。以暢其言。先生世有令德。少卽恪守庭訓。立身行己。循循矩矱。聞一善言。必默誦而強識之。有孟詵善言不離口之風。磊落有大志。未冠。經商於扶南。

之國。旣壯。服賈於巴渝之郡。閱歷旣富。識力愈遠。懋遷之途日廣。化居之量益宏。繼此則於廣州香港安南諸重地。多所建設。增拓營運。洪規偉畫。涵蓋闔閩矣。而其爲商也。雖日在持籌握算中。未嘗或忘疇昔立身行己宗旨。故宅心必誠。待人必信。見利必審於義。處事能竭其忠。苟其業爲有害於當世。有違乎本心。雖市利百倍。皆舍而勿取。惟物力之消長。則體察甚明。時機之進退。則應赴極敏。商務盛衰。如波濤浩瀚。漲落無常。巖岫叢阻。險巇莫測。先生則歷境平坦。不逢傾蹶。遵道得路。遂臻富涯。持之正而守之定。

也。資力既厚，乃能役其財以濟人利物。如建祠贍族，賑饑診病，扶危濟困，矜孤卹寡，凡屬義舉，見而必爲，爲必竭力，人皆稱頌。先生之至德，而吾則謂凡此皆先生餘事，更有重大而久遠者，則以興學一事爲至焉。夫世之盛也，則學校興焉；家有塾，黨有庠，術有序，國有學，皆國家設之。世值紛亂，宮牆榛莽，國家不能治，或藉齊民有德者，助其建興，如五代之亂，天下無復學校。有曹誠者，首捐私錢，建書院於宋城中，復買田市書，以待來者。南宋有鄭聰老者，讓其宅爲黌舍，皆稱於史。然考其規模與其資力，較之先生

不及遠甚。尙稱之如此。而先生之成就博大。可無稱乎。先生自丁巳年。在新會城開辦貧兒義塾。同時在香港辦成男女義塾多所。壬戌。於縣城建景堂公圖書館。建平山學校。助成廣州高等師範附屬小學校校舍之建築。癸亥。在縣城設立職業學校。凡所建設。其規模必極完備。基本必甚鞏固。已糜資數十萬金矣。年來正學沈淪。異說蜂起。承學之士。多以芟夷聖賢義理。提倡悖亂言論爲能事。風起潮湧。汎濫而不可遏抑。人心日益囂張。世局日益紛擾。先生知非表彰經義。不能止息亂萌。非別創學校。不能表

彰經義。於是倡建漢文中學於香港。以尊經復古爲主。明體達用爲歸。此校旋歸官辦。香港大學亦乘時籌設中文學院。先生於大學前已捐助五萬餘金。今於此院捐助倍厚。更多方召募。使得成立。令子秉華秉芬昆仲。由中學以達大學。皆肄業其中。器識文藝卓然成材。山川作霖雨。霖雨必先注于山川。亦理所必然。數千年聖賢墜緒。得延一線于此島者。伊誰之力也哉。棫樸之詩曰。周王壽考。遐不作人。天子能作人。猶獲壽考。况海濱商旅。能竭心盡力。以敬教勸學。助國家作人之未逮。其壽考必更無疆矣。

先生其亦許斯文爲非貢諛乎

賜進士出身誥授通奉大夫實錄館協修國史館總纂翰林院編修通家愚弟賴際熙撰賜進士出身誥授光祿大夫頭品頂戴賞食三品俸南書房翰林前都察院副都御史通家愚弟溫肅書翰林院編修通家弟區大典翰林院編修通家弟岑光懋翰林院檢討通家弟區大原度支部主事通家弟羅汝楠河南卽用知縣通家弟陳煜庠湖北候補道愚弟金湛霖文科學士通家弟李景康文科學士通家弟林棟世愚弟宋寶琳

蓋聞莊美尊生。孔稱凝命。善人必膺多福。仁者宜躋大年。在昔殷家。斟雉之賢。磻溪釣璜之叟。莫不天衍洪算。躬膺曼齡。誠以含飴履中。頤性養壽。襪翔嘏集。

應之如神。德厚信。積之自裕者也。恭惟馮公平山先生。家承世德。躬踐儒脩。以宗慤之壯遊。爲朱公之貨殖。聲騰百粵。譽播重洋。陳仲弓之寬平。鄉人訟息。管幼安之禮讓。海表風迆。若夫散堯夫之麥。糧可饋貧。植董奉之林。藥能壽世。當仁不讓。見義勇爲。大哉善乎。有足多矣。况夫普施教育。廣播文明。塾校如林。圖書有館。化民成俗。爲國育才。迭有豪捐。曾無吝色。追懷曩哲。盧文錦尙有嗣音。并論時賢。葉澄衷應難專美。宜其鄉邦傳頌。婦孺交推也。今者蘭墀日永。桂樹香霏。碩德耆年。值懸弧之令旦。承歡媮老。開介

壽之華筵。信晚節之彌堅。知餘慶之未艾。維玉等忝
司縣治。辱附友生。愧無悝鼎之銘。聊借麥邱之祝。蒼
生福大。常留功德之雲。壽者相成。卽是菩提之樹。

新會縣縣長黃維玉暨職員石宇澄梁君璞蔡公澤何龍
章何伯舒嚴訓遠米繼業鍾祥初等新會縣立中學校校

長梁君璞撰林子康書

丹邱日麗。吉祥開四照之花。絳縣風清。馨逸種長春
之草。華封之祝。則爲富爲壽爲男。天保之歌。則如川
如日如月。傾壽觴而進頌。稽古籍以皆然。然而恆流
祝嘏。侈陳金石之諛詞。俗尙祈年。競作支干之隱語。
擬鳧飛之葉令。到處則長作地仙。稱燕喜之魯公。有

人則咸呼生佛。徒資唱劇。無補高深。曷以攬揆之良辰。用述生平之偉蹟。庶知于公門容駟馬。代積陰功。因識王氏庭植三槐。家多令德。義昭激勸。上士聞而傾心。事異鋪張。達人爲之點額。平山馮先生者。大樹名家。岡州望族。少而岐嶷。徐孝穆有麟子之稱。幼卽清通。謝超宗博鳳毛之譽。值時遷而會轉。遂棄學以從商。弘高載贄。徜徉暹土之間。樊重治生。蹀躞錦城之會。道精億中。術擅居奇。懋遷則跡遍五都。富厚則侯同千戶。旣而返旆粵城。揚鑣香海。晏嬰近市。閭里藉其干楸。范蠡成名。庶流仰其匡濟。驥嘶向日。駿

譽馳風。宜乎在粵則方便醫院。愛育善堂。資同事之楷模。在港則東華醫院。保良公局。作羣英之領袖者矣。綜先生之德義。固不勝書。受斯世之揄揚。尤推數事。憶昔乙丑之交。正呼庚癸之會。斯時也。終軍請纓之地。勢將易子而炊。陸賈奉使之鄉。慘見量沙以食。先生權居晉使。告糶秦封。堯夫之指麥可期。姁女之數錢有待。乃季布一諾。夙見重於千金。使佗城萬家。解倒懸于頃刻。米號通腸。田稱續命。敬頌先生斯美一也。先生神姿駿偉。等汾陽之在行中。進止雍容。似孟嘉之來座上。其居遲也。有富人焉。識文

公于羈旅。擬滕秦嬴。斥卓氏之資財。願歸司馬。而

先生則遺簪不棄。故劍是求。湖陽見却。宋宏之盛德。堪師。江汜不歌。召南之遺風。尤遠。敬頌先生。斯美二也。且也。聖爲尼父。常思狂簡之裁成。賢若文翁。每恐絃歌之輟響。先生心崇名教。志切甄陶。樹人立百年之計。頻佈金泉。藏書捐萬卷之宏。滿堆玉軸。爲儒林之護法。作吾道之干城。遂使微生知奮。激昂于馬隊之中。下士潛修。哦誦于牛衣之裏。化成自古。氣淑於春。敬頌先生。斯美三也。同人等夙瞻北斗。已欽先進之徽猷。比掌東華。更識老成之矩範。蕭相國

規模具在。竊比曹參。黃叔度德量堪推。慕深荀淑。茲以懸弧之日。恰值杖國之辰。惟仁者壽。祈淪是爲善之徵。大德曰生。博濟享無疆之福。獻麥邱之祝。謹操觚挾冊而前。斟菽井之觴。爰拾級歷階而上。

東華醫院同人羅文錦何爾昌梁猷生梁毓麟余焯生羅

竹齋陳子衡馬詩傳馬爲煖何世奇郭雙鰲莫達焯林裘

謀陳炳郭琳爽關溫伯羅長肇黃廣田李海東馬敘朝謝

蔭堉辛聖三羅延年雷蔭蓀伍于簪何華堂羅雪甫麥遂

初陳季洛易紀儔陳益典黃桂清劉亦焯伍耀廷李杰初

雷家安李致祥林翰屏陳少卿林香麟羅公睦容冠文謝

逸芻談伯韶李文啓曾富梁基浩謝仲良鄭雁名曾曉民

朱赤文陳翼雲

馮平山先生七十壽言彙錄

夫松柏植地。盤鬱以葆其真。雲霞麗霄。紛郁以煥其采。蓋敦龐者氣厚。淳鬯者神凝。二首六身。算亥年於絳縣。五利四福。紀茂稷于焦林。齒德之尊達三樂壽之徵惟一。鄭氏曰修德獲報。荀子曰美意延年。如我平山先生者。洵可述焉。先生天賦殊姿。幼標夙慧。稟岡州之間氣。承大樹之家聲。爰自髫齡。遙懷壯志。年十五。從季父之暹羅。習商業。僑居羅斛之地。貿遷以貶子易錢。素負積著之材。趨時更羽鳩司歲。陶公百璧。能習勤勞。晏嬰一裘。是知簡儉。木屑竹頭之細。酒材菜把之微。莫不悉意經營。劬心擘畫。時有暹

商慕其俊偉。高其行能。欲以女妻之。先生不可也。富貴易妻。豈尉遲之所願。齊大非偶。惟鄭忽之能辭。淳至古人之風。卓犖名儒之行。此先生之德性也。由是溯揚子之江。歷漢陽之樹。問錦官之里。資絺成書。剗郟江之筒。醅釀作釀。石苞鍛鐵。膠鬲市鹽。韓康高採藥之名。灌嬰習鬻繒之業。熨僮笮馬。通巴蜀以紛馳。鐵艦颺輪。指婆蘭而遠邁。是以猗頓馳聲於上國。白圭延譽於名流。此先生之創業也。旣而倦翮知還。緇塵罷浣。跌宕枌榆之社。研求福善之書。乙巳吾粵米荒。善堂敦請。先生赴港購米。朱提萬鎰。忽

意外以愆期。白粲一艘。竟江頭而滿載。故鄉訝其不價。港商鑒其真誠。固緩急之可通。實至誠之相感。嗣留香港。更展鴻材。歷次被舉爲東華醫院首總理及顧問。保良局首總理。團防局紳。太平紳士。大學堂永遠監理員等職。楚材晉用。藉表聲華。桑敬梓恭。靡辭勞瘁。及鋒而試。生平忠爲人謀。錯節益堅。天下胥思己任。癸丑粵局倏擾。金融影響。東華醫院存款。衆議提取。先生尼之。毅然以產業文據作質。衆議遂息。資財賴以流通。厚生利用。處理出於鎮靜。易危爲安。遇事則公爾忘私。阜財而民以解慍。此先生之敬

事也。若夫至性克敦。彝倫爲重。睦族存義。宗廟爲先。先生則仰承父志。捐建祚祥祖祠。希文義莊之記。同此恢闕。老泉修譜之亭。遜茲結構。有睦婣任卹之誼。立型仁講讓之規。其會友也。倡辦港僑新會商會。別貨而知市價。相示以時。敬業而樂同羣。各抒所見。其興學也。在邑中則設貧民義塾。平山學校。職業學校。景堂圖書館。在廣州則捐高師小學建築費。在港則設男女義塾。又特組孔聖會中學。捐助香港大學堂費。閱書樓購書費。而邑中公園之養拙亭。白沙公園之嘉會亭。建築之費。皆獨力任之。綜核前後所辦。

義舉。約費數十萬元。扶輿風化。導育顓蒙。廬杜陵廣
廈之心。闡虞溥染人之說。袁彥章表彰至聖。落落高
風。盧道將優禮羣儒。彬彬大雅。向邗之四科設教。多
聘漢代大師。張寬之七業俱興。都本宋儒學案。此
先生之崇學也。先生家本儒風。長習商業。奉己儉
約。而處世慈和。俗嗜皆蠲。而好學彌篤。常手格言聯
璧一書。晨夕諷誦。伎求悉泯。仲由用以心臧。敬信可
行。子張書諸紳帶。凡茲淑善。聿啟禎祥。喆嗣秉華
秉芬。秉芹三君。標秀鱗年。濯采綺歲。趨庭洽訓。共歌
朱萼之編。燿穎其髦。克守清芬之舊。一門雍睦。美矣

盛矣。今年八月十八日。爲先生七艷壽辰。合僑港之同人。慶懸弧之令誕。班衣隨列。恭擎鞠脰之觴。冠蓋盈門。雅奏壽人之曲。月照當頭之鏡。仙桂長榮。露明洗眼之囊。方瞳不老。採羅浮五百峯之琪草。廻環共向老人。祝蒙莊八千歲之大椿。綿永常標仙幹。可知康強逢吉。餘慶爲積善之徵。福德有基。傳述資後人之範。夫豈徒想望丰采。誇家慶之畫圖。旃飾腴詞。美修齡於旗翼已哉。是爲序。

僑港新會商會董事鄉愚弟趙超凡趙贊虞盧子初黃惠

伯陳聘子陳寬典陳幼梅聶簡庭余松劉毓芸余斌臣呂

維舟阮文邨鍾錫藩高亮清蘇壽南蘇英才陳瑞祺林翰

屏黃璧泉朱璧東容漢如湯亦唐關淡河鍾健生李藝池

馮景山李幼泉林巨川鄭拔卿甘達之鍾潤卿鄉愚弟關

豐之施章雲馮伯婁黎瑞生黎亦韓僑港鄉愚弟昌言行

昌盛行商衆世愚姪梁廣照撰鄉愚姪李明若書

香飄丹桂。懸弧恰值仲秋。茂比蒼松。晉爵期臻上壽。
奏霓裳之曲。綵戲婆娑。開畫錦之堂。燭輝燦爛。當秋
高氣爽。合醉桃觴。正人壽月圓。歡騰蘭砌。今先生
鄉稱善士。應添東海之籌。人羨散仙。咸獻南山之頌。
先生岡州人也。始平巨族。香島殷商。童幼挺岐嶷
之姿。弱冠蘊飛騰之志。知非凡驥。向日嘶聲。定異常

鱗。接天鼓浪。少承鯉訓。壯展鴻圖。清光緒癸未。先生舍暹羅而走巴蜀。馳驅於瞿塘峽口之間。輦貨財而返粵東。經營於羊石珠江之內。展懋遷之術。極居積之能。光緒壬辰。任廣州方便醫院及各善堂董事。歲至乙巳。粵省大饑。各善堂辦平糶。舉先生赴港購米。期至而款不來。幸先生誠實。見信平時。竟允米先放行。款後清繳。決西江之水。涸鮒更生。運南國之糧。哀鴻息叫。未幾。歷任香港東華醫院。保良局首總理。團防局紳董。大學堂永遠監理。太平紳士。民二兼理東華醫院財政。是年適值變生內地。影響金融。

先生對於醫院付款。處置裕如。內既能寢息流言。外亦可維持大局。應變鎮靜。擘畫周詳。俠義之風。居然施及異國矣。歲在甲辰。先生承先訓而建祖祠。祀四時而親九族。肯堂肯構。象取精工。美奐美輪。形呈壯麗。俾爾昌爾熾。縣瓜瓞於來茲。俾爾壽爾臧。培芝蘭於今日。廟爲先而室爲後。經營之次第攸分。祖有德而宗有功。追遠之孝思綦切。先生入則懷聯宗報本之思。出則有興學育材之舉。助廣州興學。建築費則捐於高師。助香港育才。購書費則捐於大學。他如組織新會港僑商會。提倡則助彼鉅資。創辦孔

聖會中學堂。措置有過人精力。又若養拙暨嘉會兩亭。分建於象山白沙兩公園之內。所有經費。皆爲先生一人擔負之。綜核捐資。前後約六七十萬圓之鉅。除辦善舉。大半爲興學所需。宅心仁愛。善事無不勇爲。成性友于。遺產未嘗過問。先生可謂孝弟謹信。愛衆親仁者矣。喆嗣秉華秉芬諸昆玉。皆在香港漢文中學畢業。隨考入大學中文學院。壘麓競響。時賡棠棣之章。金玉其相。克紹箕裘之業。此良由善氣所鍾。遂獲有餘之吉慶也。先生又爲我東亞銀行之大股東。而兼永遠董事也。握算持籌。素工會計。

多財善賈。雅擅經營。對於我銀行營業進行。尤爲竭力。始終不懈。休戚相關。故我銀行發展之速。成績之優。以先生之力爲最。旣儲貨殖億中之才。復有樂善好施之舉。爲紳商中之鉅子。作慈善界之先河。富而且仁之稱。先生居之當無愧矣。於以知先生之難能可貴也。千祥雲集。五福駢臻。不亦宜乎。是歲中秋節逾三日。迺先生七秩榮壽良辰。是翁也。疏髯欲仙。洪量善飲。精神比伏波而矍鑠。風采具庾亮之婆娑。步健如飛。奚待策山濤藜杖。眼光若鏡。何須酌胡廣菊泉。壽臣等旣屬同人。尤稱知己。覩蟾圓之

月色純嘏方臻。仰鶴立之霜姿。期頤可許。借麥邱而獻祝。同登戲綵之堂。吹黍谷以陳詞。特侑祈年之爵。更望長開善果。常留功德之雲。今雖初現壽徵。定益神仙之算。是爲序。

清奏調外務部參議花翎二品頂戴奉天錦新營口道大

綬二等寶光嘉禾章大英國爵士香港議政局定例局議

員東亞銀行董事局主席鄧周壽臣暨董事黃潤棠李冠

春郭幼庭簡英甫陳澄石黃柱臣總司理簡東浦司理李

子方副司理周始南

國曆十有八年秋。八月旣望有三日。平山先生七
袞大慶。喆嗣秉華世兄昆仲稱觴於府第。壽臣周

爵士既述其行事。爲文以徵言。凡犖犖諸大端。亦已本末備矣。抑尤有關係於本公司。在先生爲小節。而玉階等身親奉教者。闕而不宣。小子何述焉。竊嘗聞之。舜以大德。必得其壽。子輿氏稱其善與人同。故與人爲善者。德也。卽壽之符也。民國八年。公司議以一家之業。公于有衆。先生曰。斯事雖細。然以國貨與外商競。亦以塞漏卮之一孔也。毅然署名發起。更先投巨資以爲之倡。既集。又躬自點收。庶事庶物。必察必審。弗辭勞瘁。此善與人同。爲得壽之徵者一也。先生既興學於故鄉。猶以爲未普。屬公司有義

塾之設。乃爲分一校于新會之邑城。鬻舍之貫租。校師之遴聘。學款之墊給。數年如一日。公司忝居其名。而不知實出于先生疲精勞神之所賜也。此善與人同。爲得壽之徵者又其一也。十三年。股東常會。僉以先生有勞于公司。欲資其才望。投匭舉爲監察。先生曰。吾之盡力于公司者。非爲名若利也。爲內國之實業也。吾老矣。諸君子好爲之。誠使土物日臧。業漸以起。能與歐美并。願斯足矣。功不必自己出也。辭不就。所謂正其誼不謀其利。任其事不有其功者歟。此善與人同。爲得壽之徵者又其一也。夫常人之

壽命胥賦於天。而尙書謂資富能訓。惟以永年者何也。蓋樂善不倦。天爵旣修。則胸次坦然。生機洋溢。無險陂陰詭之意。斯無顛躓傾仆之虞。自能常葆天真。如春風及物。萬稿賴以生育。况乎陽和之本體。耿耿乎其元精。有不貞固而悠久者哉。此其說雖迂。其理雖微。而實則至常且確。故曰大德者必得其壽也。迺者先生以杖國之歲。有矍鑠之精神。戚友族鄰。皆著有詩詞爲之稱慶。凡可爲國人矜式者。旣詳其概。玉階等固陋。無以測河海之深也。言又不文。無以廣九如之頌也。謹就其親炙之所及。而彰彰在我同人。

耳目間者。舉其一二端。敬以爲先生壽。雖曰蠡測而管窺。或亦竊比於見仁見智也。

南洋兄弟菸草有限公司同人晚生簡玉階陳廉伯簡英

甫等

屠維大荒落之歲。中秋節後三日。爲馮世丈平山先生七袞覽揆之辰。是日也。鳧化東望。集蓬島以稱觴。鶴奏南飛。繼幔亭而張樂。桑弧篤慶。桂蕊流芬。上稽近代。與公同月同日生者。爲王麓臺侍郎。畢秋帆制府。姚薑塢太史。一以善畫。馳藝苑。一以好賢。廣賓館。一以能文。標桐城。合以公之作人壽考。仁惠

遐邇。嶺海內外。銅鑄絲繡。可謂同一揆。具四美矣。

公培後進。流澤嶺表。公雄貨殖。濫觴川渝。其善聚財也。則計然時物。燭其機智。其善散財也。則希文憂樂。符其志事。光緒乙巳。粵米荒。貲未猝集。疇若先赴港舟。泛粟。僉曰。公哉。龍袞九章。必挈一領。馬服千里。乃瞻其首。疇若任東華醫院保良局首總理。僉曰。公哉。豫章之木。乃勝大廈。瑚璉之珍。貢於席上。僉謂。公被選爲團防局董。大學永遠監理。太平紳士。其勿固辭。公迺慷慨就任。其翕然中外倚重如此者。十年計者樹木也。百年計者樹人也。公視天下

之大以爲匹夫有責。若邑城。若省會。若香港庠序之
教。圖書之館。仁利也溥。貲億萬金而靡吝。自奉也儉。
一粟一縑而必惜。人皆稱公之歸粵。爲子產衆人
之母也。吾以爲公嘗入蜀。聞文翁興學之風也。西
蜀子雲之亭猶存乎。而吾粵楊議郎故居。無松鬣矣。
杜陵浣花草堂無恙乎。而吾粵三君之祠。菊坡之精
舍。鞠園蔬矣。想公當日歷劍門。溯岷江。登褒斜棧
道。回望五嶺。雲煙縹渺。念鄉人士望學喁喁。必曰歸
與歸與。吾黨小子。不知所裁者。其所感想當何如也。
香港漢文大學。則胡安定之湖州經義齋也。建祚祥

祖祠、景堂圖書館。則韋賢述志之室。龔勝種柏之堂也。尤難者嘉惠士林。不私己有。以視錢氏書藏。榜於東坡。范家傑閣。取名天一。籤軸雖美。畛界猶分。以公方之。量尤宏矣。今者公之喆嗣秉華秉芬。世兄已由漢文中學升香港大學。鳳毛濟美。幼子秉芹。亦犀角標奇。王家羣彥。世號三珠。鄧侯諸兒。分通六藝。試與過薄扶林道。徙倚大學柯蔭。旦也預知三公。此卽王祐身種之庭槐也。憲之後爲吏部。此卽顧凱手植之嘉樹也。肇堅等於東華醫院。望公顏色。又獲登耆英之堂。於令阮鏡如兄取義善交。久同聯真。

率之會。忝居小友。聯祝大年。臚陳實事。以侑康爵。若夫頌柏評松。鋪張洪算。雕雲鏤月。肸飾諛詞。則讓當代之文貞學士。儒林丈人。懿哉鑠乎。匪所詳矣。

前任東華醫院總理世愚姪鄧肇堅羅延年伍華麥遂初

高良和劉星昶黃頌陶李致祥蕭叔廉伍耀廷曾曉民李

澤民李耀祥盧仲舉黃屏蓀梁弼予何華生順德張賜康

撰新會李明若書

燕喜作頌。豈弟宜年。壽考之隆。在昔爲著。蓋松柏獨厚於天。而歲寒不落。者碩獨鍾乎德。而人瑞以彰。故國慶喬木之思。魯殿鬱靈光之秀。後生獲所瞻仰。古訓于焉式承。是以攝齊者稱萬壽之觴。考獻者上九

如之頌。貺嘉庥于靡旣。篤純嘏于永延。邵德膺福。夔乎尙已。我平山先生。以始平碩彥。新會耆英。年才十五。自立純成。初棄毛錐。遂商海外。性情和藹。遐邇稱賢。學善計然。億則屢中。熱心公益。樂善好施。見義勇爲。當仁不讓。其豐功偉績。筆不勝書。第彰彰在人耳目者。尤以裁吾黨之狂簡。館設圖書。成斯士之譽髦。校開義學。輸糧平糶。以惠窮黎。賑災卹鄰。而拯飢溺。靡不慨捐鉅款。調濟鄉邦。此古之卜式堯夫。未遑多讓。誰謂闔閭中無豪傑者哉。今秋夏歷八月中浣。爲先生七秩降嶽之辰。恰值蟾圓。當稱兕爵。其公

子輩綵衣翩舞。一室同歡。大棗如瓜。雙盤快捧。洵極一時之盛會。預爲百歲之添籌。星衢得覩隆儀。忝叨愛末。貢言上壽。義所應爲。然自愧不文。難成鉅製。惟願先生天錫純嘏。再周三遊赤壁之年。我祝遐齡。好續七老香山之句。

愚弟李星衢偕男伯堯伯達

予棲身海隅。不揣孤陋。頗從諸先達之後。以扶掖國學爲職志。因而得交於新會。馮平山先生。顧先生。靄然仁者。蓄誠於中。任勞於外。絕無時下豪商之習。而孜孜然惟提倡國學之是謀。吾固知先生之

所蘊蓄者。固有以異乎常人也。夫匡世之道亦多矣。卽吾粵一省之地。兵燹頻仍。民生凋弊。政潮激盪。無或已時。本港爲粵人來往之區。憂戚與共。則兩地之有待於當軸之安輯者固多。而有賴於社會人士之培植者亦不少。先生痼瘵在抱。濟病撫災。固不後人。然其汲汲然尤以提倡國學爲當務之急者。誠以教育之道。不啻根本救濟之方也。蓋施漿賑粥者。治其標。作育人才者。治其本。卹災扶困者。利其一時。教之學術者。利其終身。况推而至於國家隆盛之基。莫不溯源於是者哉。先生孜孜興學。固其識見遠大。

有以異乎常人也。繼而先生哲嗣秉華秉芬兩君從予遊。聰明力學。每試輒冠其曹。而樸素自安。恂恂然若有所不足。予知其得之於庭訓者甚深。因叩其所自。始知先生嘗寢饋於格言聯璧一書者數十年。雖身處闐闐之間。而志存聖賢之業。則其立身行己。卓然皆有可觀者。蓋其蘊蓄於中者有自來也。今先生日以提倡國學爲己任。蓋亦推聖賢己立立人已達達人之心。能知而能行之焉爾。茲屆先生七十遐齡。中外人士。交相頌祝。先生生平之偉舉。想已殫述而無遺。予獨記其志行之純。其來有自。且

能躬行而實踐之。俾世之仰慕先生者。亦知聖賢學說之功也。

通家弟李景康

士農工商。古稱四民。而商列其末。此三代抑商之意也。三代以農立國。重土著。輕游食。以商人之逐利而轉徙也。於是乎抑之。抑之而商之自待也愈微。頑鈍亡恥。譛詬亡節。天下之興亡。非其責也。世道之隆替。非其事也。其意曰。吾儕小氓。固已不齒於士大夫之列矣。吾亦惟利之是趨焉。斯可矣。嗚呼。此皆流俗人之見。而豈所論於豪傑之士哉。今夫財猶水也。水之

積也愈厚。則其橫決之力必愈大。善治水者。道在通之。通之則其流愈長。其流愈長則其源愈遠。故善理財者。不患生財之無道。而患用財之無方。用財無方。其病在壅。又病在濫。壅之極也必決。濫之至也必溢。天下不少連城敵國之富。不轉瞬而財匱名沒者。相隨屬。豈有他哉。有財而不善用其財。而壅與溢之爲病也。吾邑 馮平山先生者。善用其財者也。經商數十年。積資累鉅萬。好善樂施與。而興學設教。宏獎人才。尤三致意焉。若夫車馬服御之豪侈。酒食遊戲之徵逐。則蔑如也。先生善居積。愈老而愈富。論者咸

以天道福善歸之。吾尤以爲盈虛消息之道。固如是也。苟得其道。何物不長。苟失其道。何物不消。先生之於財也。求之有其道。用之有其方。故其財愈多。而用彌廣。沛然若江河。莫之能禦也。夫豈尙壅與溢之足患哉。吾嘗以籌辦港大中文學院。與先生相周旋。其爲人也。厚重寡言。而言必有中。其處事也。審慎周詳。而當機立決。其於中文之事業也。提倡之惟恐不力。擘畫之惟恐不周。既合衆力以奠中文學院之基。復舒獨力以成中文書樓之舉。今天下方且蔑聖棄智。相率而摧毀堯舜禹湯文武周公孔子之道。而

先生獨能尊之重之而思有以保存之非所謂知興亡之有責而鑑世道之隆替者耶。老氏不云乎良賈深藏若虛。君子盛德容貌若愚。若先生者豈不誠商賈之豪傑也哉。今年先生七十。謹爲文以壽之。且以表先生之善用其財。以爲世之有財者勸也。

通家弟林棟

粵以己巳之年。仲秋之月。八方風平。四表雲瑞。蓬壺冰朗。環海鏡清。大椿之壽。有三萬二千之奇齡。騎鶴之仙。餘一千七百之來集。麟脯鳳漿。廣設幔亭之宴。

雲璈水瑟。同聆洛浦之歌。融融洩洩。郁郁彬彬。無疆
惟休。有秩斯祜。其惟吾平山馮老先生七十稱觴
之慶乎。先生大樹家聲。錦車世胄。宰相之堂。萬柳
太守之馬。五花南來雁戶。與白沙爲同鄉。東望鯉庭。
談岡州於少日。一生謙雅。寫向儒書。大衆皈依。演成
世法。當此弧懸旦協。兕祝良辰。貞桂不蠹。飄香於金
粟筵前。明蟾自高。弄影於老人星畔。我輩誦闕宮之
詩。題絳縣之字。臚言夙聽。平時已爛熟胸中。懿行徽
詞。今日宜繡絲屏上。蓋聞戒慎必恭。丹書之銘也。積
善餘慶。綠純之冊也。資富能訓。惟以永年。垂裕後昆。

實爲至樂。故不必挾張繁祉而喬松合契。乃在西京孝義之家。又不必脤飾異聞。而豳籥揄揚。卻有北海箋詩之筆。謹浣手而爲之序。曰。今夫葦竹如簣。衛武公之所葆身。祥金在鎔。董廣川之所鍊性。以故濟嘯道真。翼緯元化。羊珠誌其歲月。鷄彝貫以精神。先生賦詩勵志。束箭持躬。本惴惴如畏之思。導昔昔不違之誠。方其遠適暹羅。肇當初綺。有富人欲妻以女。陳平雖美如冠玉。宋宏乃不棄糟糠。賧錢竇布能詳貨殖之書。犴草撞花。不污驛程之記。牽車服賈。稊載榮歸。牂牁市上。撫邛竹以道然。畫錦堂前。栽黃花而

益茂。今者懷清築臺。富壓一郡。度尙濟物。名高八廚。而先生猶大讓小讓。左箴右箴。松節彌堅。谷神不散。此其宜壽者一也。至若堯夫助麥。子敬指困。秉此美談。傳爲盛事。然財雖輕。諸一己。澤未遍。夫多人先生則諾同季布。惠比黔婁。光緒乙巳。吾粵歲荒。善堂舉先生赴港購米。匯款未到。港商重其信義。付船先行。請得發棠之粟。口不言錢。泛來及絳之舟。鄰無閉糴。於是平仲故人待舉。火者不少。杜陵廣廈。庇寒士兮孔多。先生仁輿並載。德水兼流。大男中女。幾煩清獻之經營。後樂先憂。不愧希文之抱負。而善

者祥和之氣。慈者糜壽之徵。行道有福。與人同。麻茶亭處處爭鑄。趙熹之姓名。酒學年年。共上韓稜之生日。此其宜壽者二也。更有文翁治蜀。橫舍聿興。胡瑗教湖分齋是制。此師儒之有事。亦宦守所當爲。惟先生弦高愛國。身本商人。周處居鄉。性耽圖史。金題玉躡。羅四部之鴻篇。梓敬桑恭。作三時之雅集。供束縵而炙筆硯。構庠序以聚生徒。乞言養老。居然鸞旂泮水之音。重譯狄鞮。遠至烏弋黃支而外。計先生興學諸費。前後共捐銀六七十萬元。擲金如泥。不同虛牝。載書滿架。何止汗牛。將見琅琅誦聲。若出金石。

莘莘學子蔚爲棟樑。其功積以深。其澤引而長。碧芸十丈。卽爲靈壽之枝。寶笈千行。都是長生之錄。此其宜壽者三也。他如諸葛亮之精明。誰能欺我。馬少游之款段。不敢傲人。顏含不信。著龜自然。通泰方朔。不矜服食。常抱樂康。此昔人之所以稱賢而先生亦何多讓。觀其日弓月矢。道以自衛。禮耕義種。貽厥孫謀。守老聃知足之訓。得商瞿晚子之歡。繪西園行樂之圖。補南陔采蘭之什。僧虔蠟戲。已有桐華。道韞雪吟。不無柳絮。入親仁之里。盡是鸞龍。出履道之坊。皆爲騏驥。先生顧而樂之。蟠桃再熟。葛米新炊。舞綵

方頻含飴又試此其宜壽者四也且夫純固葆真當
識其本來之量康強逢吉必推其錫極之原先生
身如粹玉不抵鵠而常完心似廣淵以活鱗而更濬
芄芄棧樸樹人百年粲粲華黍傳家萬石作人於焉
壽考美意卽以延年古有讀嫿嬛之書如挹仙氣飲
菊潭之水同結聖因絳河日暖乘螺舟者幾歷由旬
瓊島風淳話鷄窠者渾忘甲子而先生爲何如也
中秋後三日喆嗣秉華秉芬秉芹以先生攬揆
之朝爲舉祝嘏之典先生戒勿鋪張謂毋以有用
金錢爲老人糜費國奢示儉依然晏子之風家富不

驕爰有姬公之度。而兒孫鞠脰而前。賓友黎收而至。獻安期之火棗。調以滑甘。吹子晉之銀笙。聽之欣悅。先生其亦掀髯一笑。進爵一卮矣乎。紅爐峰峻光耀近瞻南極之星。紫誥文成。揚麗合織西川之錦。

三水黃榮康祝渠撰郭仙洲黃次屏黃春生陳延叔蘇熾

庭鄧星三李輝堂李鑑堂鄧仲南麥德鄰葉竹軒李樸生

黃恩榮楊錦幟葉冥階陳良樵黃槐庭黃百勞謝萱伯潘

冠英高理庭鄒可雲周紹文黃綿發周希甫黃紹沂黃華

屏黃瑞川李孝實馮子飛馮頌文麥國權黃旭源馮鑑明

李顯球公和昌冠祥號祥記號昌和行福記號

古來倜儻非常之士。必有高世之才略。過人之器量。當其未遇。天不惜奔走勞役。俾明達歷練。老其材以

爲鄉邦造福。斯其一身之消長。恆與世道人心有莫大之關係焉。是故天之所與。輒能豐其遇。永其年。使其善氣之彌綸。得以綿延於勿替。竊嘗以此求之。桑梓中若我姊婿平山翁。殆其人歟。翁幼而歧嶷。迥異常兒。麟先嚴海德公時與。景堂姻太翁職業同里。杯酒過從。識翁爲英物。遂聯秦晉之好。以長女妻之。屈弱冠。卽投筆習計倪術。初從季父游暹埠。未獲展素抱。旋溯大江而西。逾漢入蜀。集渝莊。謀什一。爾時商戰競爭。每于求供酌劑。悉心籌畫。由是纖嗇兼收。芝箭并蓄。操奇計贏。不數稔而號稱素封矣。

夫世之擁厚資。善居積者。稍一得志。遂不免縱情聲伎。飲博自豪。黃金虛牝。大都得不償失。卽不然。而腰纏旣豐。宦情頓起。類多假慷慨任俠之名。以施其奔競夤緣之術。卒至五陵裘馬。漏盡鐘鳴。泯然澌滅。其果能毀家抒難。以利濟羣生者。有幾人哉。今觀翁歷充省港善院善董。廣行方便。惟日不足。雖政府屢下顧問之聘。悉避之。若浼惟竭其力所能爲。以匡官治之不逮。則競競焉。若舉辦平糶。若維持金融。均能統籌全局。力肩鉅資。凡地方之賴以救濟者。得季布一諾。無不咄嗟立辦。蓋其衆望歸而信用著也。荀卿

有言曰君子在朝明其政在野美其俗夫美俗之事莫大於教育昔葉澄衷以一人捐助學款三十餘萬士林傳誦若翁先後捐出教育之資竟達六七十萬其義舉古所未有至於灌輸文化啟發新知又以創建圖書館之規模爲獨大兼以紀念其先人尤爲錫類推恩之旨此豈沽名市義者所可同日語乎且翁之樂善好施無鉅細不形德色生平篤念故舊卽如麟少荷翁之青睞壯繼先嚴之遺志率諸姪兒分莊于長江流域者至今猶利賴之至其立身行己恆得力於戒欺暇則假詩書以資蓄德故有格言

聯璧之輯。殆并恂恂有儒者風矣。溯曩歲遠遊歐美。繼度京滬。凡攷察商學。流覽名勝。皆足以廣見聞而滌塵抱。倦遊後。頤養香港。體康神健。年彌高而德彌邵。以視坐享雄資。漫無建樹。猶復鎮日持籌斤斤焉。爲子孫豐殖之謀。終其身無片善足錄者。其賢不肖相去爲何如耶。今年秋。爲翁七秩初度。喆嗣秉華秉芬等。咸欲稱觴介壽。翁以糜費卻之。不獲命爰體翁意。擬徵詩文。以助慶祝。屆時蘭玉盈庭。翩翻戲綵。其隨班酌兕而進者。復有三黨親舊。邦人諸友。祈祈濟濟。麟雖不文。忝屬姻誼。知翁行誼稔例。

得一言以爲媵爵助謹綜其生平犖犖大端以諗來者。俾知陰德耳鳴。積善餘慶。蒸蒸日上。未艾。覩縷言之。以當野人獻曝之義云爾。

制外弟李錫麒撰書率姪伯鏘慈亭鑑泉男國鈞國藩姪

孫燮堯欽岳星南人傑

洪範五福。一曰壽。壽之足貴。自古然矣。雖然。有有限之壽。有無限之壽。有限之壽。曰耄。曰耋。曰期。頤而止耳。若夫無限之壽。則非徒年齒已也。是必有所以永其壽者。何也。曰德而已。蓋以德而永其壽者。乃能歷久而不敝。逾遠而彌長。如我姪兄平山馮先生者。

庶幾近之矣。先生能讀父書。以志學之年。棄儒就賈。之暹埠。牽車孝養。子道克敦。未幾。而丁外艱。歸服闋後。貿易川渝。不辭勞瘁。身雖在外。而友愛綦篤。其於先世遺產。未嘗過問。嘗曰。人能於分占財物時。視爲父母多生幾子。於有事出資時。視爲父母祇生己身。則必無爭執。是殆庸德之修於家者歟。至若周卹族黨。興學立教。矜存鰥寡。孤獨無告者。種種善舉。非先生其誰屬之。其大德之及於人也。又如此。有是德。故有是福。先生卒能點金多術。餐玉成方。善人是富。理固然也。岡州古多德厚信。砥礪翔祐集之瑞。

余嘗逕能子塔南浮鱷洲東眺鎮崖之臺北謁慈元之殿。隆木千本松高百尺。其間者隱老壽。歲寒不凋。歷朝魁碩。麗焉馮焉。生斯土者。其人多壽。宜也。先生其有以應之哉。令嗣君三。英姿卓犖。鳳毛麟角。濟濟一堂。今歲中秋後三日。爲先生懸弧令辰。晉七秩觴禮也。余忝聯婭誼。更屬同宗。徒以賤冗羈縻。未獲赴港而登堂展祝。謹陳懿行。爲侑爵之言。則曰古者尊老。非直尊其年也。有德焉。若先生者。可以壽矣。

林樹人敬書婭宗弟馮耀宸率男福鈿孫銘銓

九五福曰壽。禹疇演神馬之圖。八千歲爲秋。唐殿奏靈鼇之曲。然慶由陰德。語紀香山。福本利施。辭登說苑。自來壽者。厥曰仁人。用是天假之年。人永其譽。頌魯侯以燕喜。爰有詞臣。侑坡老以鶴飛。正多名士。况復蘭交締好。葭附聯姻。祝古稀之高年。晉始平之名閥。敢不登堂鞠脛。頌禱岡陵。拜手賡歌。揄揚泰斗。我平山先生。盆允鍾奇。義甯毓秀。鄴侯書架。早窺志學之年。范蠡扁舟。亟講治生之術。一肩行李。隨季父而跋涉關河。萬里梯航。履暹阜而懋遷貨賄。時有富人。知公大器。呂公小女。奉箕帚以來嬪。枚乘小妻。

甘帷房之降。列萬金許。贈奩具滋豐。公乃婉謝。蹇修託辭親命。誠介節能貞者矣。暹駟南返。蜀旆西征。赤岸青城。幾歷蠶叢之路。錦江金水。載揚龍躍之波。轉物候時。多財善賈。管子之百符一馬。妙擅權衡。易林之六耦三奇。遂豐居積。歸裝糗載。聽猿聲而下三巴。脂牽遄臻。策馬首而瞻五嶺。旋出任省城。方便醫院及各善堂董事。竭心規畫。起居忘燕息之安。張手救援。呼籲憫鴻。嗷之困。適舉辦平糶。衆推公赴港購米。善款遲到。米舶先行。蓋以鼎言金諾。見重人羣。遂使義粟仁漿。早頒閭閻也。粵局糾紛。香江僑寄。銳

興慈善之業。益宏胞與之懷。東華院民疾痼瘵。弁冕羣推首席。保良局華僑庇護。謳歌并祝心香。至辦理團防。監理大學。太平紳士。具恢乎有餘力。其兼理東華醫院財政。議提鉅款。靡惑浮言。保證商場。并扶大局。識尤卓卓也。公以培植人才。宜興教育。先設義學。嘉惠貧民。再拓規模。提倡職業。至於烝我髦士。展也大成。省港諸校。或助基本之金。或撥常年之費。或佐圖書之設。或賚建築之需。捐六七十萬之鉅資。泯絲忽微纖之吝色。而景堂圖書館。紀念先德者。尤敞鴻規。孔聖會中學。保存國粹者。務端蛾術。其設施於

宗族鄉黨者建祚祥祖祠松茂竹苞先靈克妥組僑
港商會。桑恭梓敬。異地聯歡。築養拙嘉會之兩亭。保
象山白沙之遺跡。公平生義舉。翫縷難勝。而好善
肫誠。耄期不倦。奉格言爲圭臬。作素行之準繩。用能
福蔭蘭階。甘逾蔗境。喆嗣秉華秉芬。入漢文大學。
秉芹髻齒。亦甯馨佳兒。比王氏之三珠。鳳毛皆貴。邁
陸家之雙璧。麟角方雛。信乎厚福未有艾也。己巳八
月。公七秩覽揆之辰。弧懸而月朗。中秋後庚三日。
斗指而星輝。南極周甲十年。公命輟鋪張。節浮費。
將作發棠之復。宏施膏黍之仁。美意延年。頌聲載道。

慕仁良朋縞紵。早識鄭僑。弱息絲蘿。新聯小阮。避兵
燹。則梁鴻寄蕪。謀貨殖。則鮑叔分金。義不取諛。事皆
從實。此日康強逢吉。雅協馮城之占。他年耄耋期頤。
屢晉麥邱之祝。

姻眷弟麥慕仁率男祿欣慶欣熾欣濂欣女玉堅玉球孫

博強博明博暉博通孫女佩蕙佩蕙

在昔紫文石簡。長生傳靈寶之方。玉檢金泥。五老啟
河圖之瑞。是以勳名壽世。品重球圖。梧欞樹人。貞同
金石。瑯嬛福地。卽是仙都。員嶠名山。胥成壽域。而况
子仁大耄。留名樹德之鄉。行己高齡。廁身耆英之會。

者乎懿惟平山先生圖書館主慈善大家杖國游儀降崧初度。恰值桂香令節。合將鞠脰致虔。然而尊老尙更者。國家引年之典也。躋堂酌兕者。後世祝釐之禮也。竊以先生髫齡好學。耽讀楹書。弱冠懋遷。竟拋筆硯。維時通商暹埠。志切泛洋。符馬生涯。季父導其先路。枳鸞棲托。富賈妄欲相攸。謝非偶於豪門。安徽時之故劍。卒之蠅頭利逐。雞肋心灰。東渡回航。西行轉旆。旄牛犂馬。別爲三倍之求。魯嗇周爨。旋赴五都之市。問南陽車騎。羣欽宛孔雍容。幸西州交通。早裕西胡金帛。白圭善販。端木運籌。蓋綽綽乎一大

實業家矣。既而稊載歸來。廣行方便。陶朱公治產居積。范文正贍族施仁。倉貸常平。賜拜仁人之粟。金儲保險。寬籌子母之錢。公私兼權。然諾必重。卒使璇源不匱。金庫無虞。非具肝膽崇信義者而能如是乎。仁風及物。得雨皆甘。耳邊之陰德獨鳴。腳底之陽春徧著。時政府聞其善舉。顧問特欲聘延。迺先生素薄虛榮。不談政治。張子房之借箸。未便參謀。虞玩之之懸車。但期知足。方古市隱。何以過之。至若興學爲育才之地。敷教卽經國之基。失學貧兒。識丁未歉。優秀份子。求己宜勤。先生欲振教育之精神。務期中西

之兼貫文翁志存造士蔚爲蜀土榷枏安定教重通
才共識胡門弟子是以開橫經之席萬間之廣廈歡
顏輸光學之錢三育之教材立備同人等曾司鐸教
未輟絃歌伏思二酉叢殘五車散佚崑崙爲羣玉之
府真本宜儲委宛傳金簡之書古文具在先生關
懷桑梓廣集縹緗遍陳柱下之編恍入洛陽之市春
明坊內借觀咸集名流天祿閣中快覩爭來雅士牙
籤標列心香遙存回思訓受鯉庭傳經未忘詩禮編
陳虎觀撫卷如接音容用是絲繡平原烏私繫念金
鑄范蠡鴻構昭垂明德之詒有由然也他如點綴湖

山。提倡風雅。作藏修之游息。亦鄉土之寄懷。魚鳥親人。嘉會樓遺碑宛在。松篁入畫。養拙軒硯沼依然。構小築以韻其亭臺。借天機而活其林壑。溪山無恙。風景一新。惟是古蹟既賴保存。孔教猶塵信仰。杏壇化雨。香江未外官牆。槐市清陰。海內別構鬢序。殖學必期普及。聖化賴以表揚。良以正人心。維名教也。基茲懿德。兆占家肥。雛鳳聲清。驂駒角咫。千言訓子。細裁王昶之書。三樂論心。爭羨榮期之遇。稱觴介福。鐫玉徵詞。當合嶺表之勝流。共抒唐山之雅奏。同人等才慚柱史。業等書傭。秘閣司藏。恍接文章天府。選樓校

錄時親風月主人學雖未通百家禮竊願伸三祝賦
南山而陳吉語蓬島書雲陳東壁而寫清芬蘭陵珥
筆正喜德星之聚同盼秋月之圓陳恭公壽日喜世
修之湖泛呈圖韓持國誕辰得子厚之詩吟當頌他
日鶴齡晉秩翌邸重張貢一闕之桂華聊作汝南月
旦毓千年之桃實長留天上歲星

新會李毓卿敬撰新會馮氏景堂圖書館同人李儀可李

緝光歐陽藻湯國光譚逸民何成羣陳照薇

中華民國十八年歲次屠維大荒落中秋節越三日
恭值 先生七秩榮壽覽揆之辰親朋鄙族靡不稱

觴介壽。摛辭祝嘏禮也。昔宣聖有言曰。仁者壽。夫壽之數存乎天。仁之用在乎人。人惟體天而施以無量之仁。天卽福人而予以無量之壽。感而遂通。理有固然。夷考先生生平。見義勇爲。樂善不倦。其仁愈至。故其壽愈高。其犖犖大端。可得而言。先生自少棄儒就賈。稍有進展。卽提挈諸弟。使能自立。則於友愛見其仁。遊暹羅。富人欲媵以女。匱貲鉅萬。先生卻之。則於寡欲見其仁。稊載歸來。承先命建祖祠。則於追遠見其仁。醫院善堂。保良團防。均推主事。不敢告勞。則於慈善見其仁。清末乙巳歲大歉。省紳議辦平

糶得。先生信諾不待交值而米舟先至。咄嗟間而病者以愈。飢者以飽。是其仁在救歲荒。癸丑軍興。港幣搖動。先生以產券保證醫院存款。維持銀市。而困者以舒。疑者以釋。是其仁在濟金融。若夫振興教育之舉。則更僕難終矣。丁茲列強環伺。鷹瞵虎視。以兵戰。以商戰。以工戰。尤以學戰。國勢之強弱。視乎學校之多寡。以爲斷。先生抱愛國之熱誠。具仁民之宏願。於港則倡立男女義學。聯立孔聖會中學。助立圖書館。與夫大學費購書費。概與焉。於省則捐高師附屬小學建築費。於邑城則創立貧民義塾。職業學。

校高小學校焉。至景堂圖書館。規模尤大。以其皇考之字額之。善則歸親。仁孝之至也。他如建白沙公園以昭景仰。建象山公園以資游息。皆足爲教育之助。不必任師儒講授之勞。而已收輔相裁成之效。端木子曰。教不倦。仁也。先生其庶幾乎。竊嘗讀張橫渠先生西銘一篇。始言民吾同胞。物吾同與。凡天下疲癯殘疾。惇獨鰥寡。皆吾兄弟之顛連無告者。于時保之。繼言育英才爲錫類。終言富貴福澤。厚吾之生。反是而言。害仁曰賊。則知仁者固無不愛也。先生愛人以德。慷慨好施。不吝財。不惜力。凡諸善舉。無不贊

助以底於成而於教育也尤重是其於顛連無告者皆得飲之食之而莘莘學子更得教之誨之本民胞物與之懷而享富貴福澤之報與西銘之言若合一揆夫富者福也壽者酬也先生富而能壽天之報施善人有不爽者故曰仁者壽也同人等自顧菲材叨蒙不棄聘充貧民義塾職教各席而此貧民學生皆所謂顛連無告者也自宜仰體仁慈惻隱之懷勉盡誘掖獎勸之責彼爲父母者固無日不焚香告天祝先生之壽考無彊也矧值茲嶽降之辰雖不獲躋堂介壽有不距躍三百者乎同人等籍庇仁宇鰲

抃彌欣。自愧不文。難資表襮。惟有竊取壽考作人之章。遙上天保九如之頌。以申積愫而已。是爲序。

馮氏義塾同人李淡愚莫浣卿何毓泉何緯甫吳俠南許

文楷吳劍華

夫星耀老人。風高長者。絜迎禧於燧代。媿建福於羲年。以是言壽。是謂壽考。若夫庇寒杜老。開萬間廣廈之歡。興學文翁。建百年樹人之業。芬垂邑乘。望重鄉評。以是言壽。是謂壽世。是故壽考得天而賦。憑鶴算以長延。壽世與人而傳。歷鴻鈞而不可。壽考不易。壽世更難。若以壽考之精神。而兼壽世之志業者。余今

始於我邑。平山馮老先生而得之。先生年踰大
董。瑞應長生。固已商皓書名。洛陽紀會。然余見其蟬
聯之語。時發鏗鏘。鶴立之姿。依然澹古。有馬文淵之
矍鑠。得高伯恭之聰強。則壽而康也。船留多寶。籛有
遺金。大道生財。不羨王陽之點。善人是賚。無殊陸賈
之裝。則壽而富也。且也佛能自在。仙更優閒。雀雨魚
風。何年是老。琪花瑤草。有物皆春。摘星辰於元亮樓
前。消日月於邵公窩上。則又壽而好德也。庭前鯉訓。
階上龍文。老來之馨桂。敷榮。晚抱之幼蘭。愈秀。石麟
馳譽。天驥呈材。則又壽而逢吉也。余嘗縱蟹城。登象

嶺見夫堂宇宏軒。則有圖書館之左經右史也。門牆俊秀。則有高小校之約禮博文也。又嘗佗城駐榻。則拯饑饉而米荒就理。蘇疾苦而藥到回春。醫院善堂。談軼事者猶嘖嘖稱善也。香海揚帆。則培實學而玉琢器成。息浮言而金融機活。總會團局。道盛德者尤豐。豐動聽也。假使錢如命惜。銅以臭遺。導養慕乎松喬。乞靈間以苓朮。則豐功莫著。乾健難符。安有如是之景祉氤氳。遐聲洋溢。壽考其身。而壽世其志哉。雖然。召之者厚。乃應之者神。必更詳其犖犖最大之行。然後知其灑灑載福之旨。厥有因焉。非倖致也。先

生童而好學。長卽經商。惟讀司馬貨殖之書。遂工宏羊經濟之學。故能業精猗頓。術妙計然。祇爭駿骨之奇。不逐蠅頭之末。則智不可及也。自夫鐵索南揚。銅琶東去。始也重溟鯤化。搏渤海之秋雲。繼也三峽猿蹄。聽巴山之夜雨。腳行萬里。雖梯山航海而何辭。目覽五洲。經美雨歐風而愈練。故能淪濬新識。馳騁雄才。凡騰蛟起鳳之遭逢。皆去燕來鴻之經驗。則勇不可及也。迨夫律已。則莫不揆以義焉。運陶公之甓。逸不忘勞。披晏子之裘。富而能儉。不以牽牛遠涉。懋遷而忘桑梓之恭。不以挽鹿分勞。見利而乖糟糠之愛。

故能信孚岑鼎。諾仰貢金。蠻貊推誠。豚魚受格。正不特煥崇規而隆廟貌。義篤宗祊。燔積券而紹家聲。義喧衢市者。則義可謂盡矣。推而處世。莫不納以仁焉。痼瘵在抱。休戚塵懷。延壺士於春桑。庇暍人於夏樾。舉凡設陳蕃之榻。指子敬之困。贈范叔之袍。捐坡公之帶。慈風所被。甘露同濡。故能陰德耳鳴。積行心廣。正不特蘭陔表潔。棣圃聯歡。謂足見仁之發自天生。浹乎人紀者。則仁可謂至矣。今者庭闈融洩。家室和平。雖謂鴻案虛懸。鸞膠罷續。而風迎桃葉。纏綿不礙。雙棲雪着梅花。窈窕開來六出。而况笑承萊舞。皆薛

家三鳳之英。夢入蘭香。現漢洗雙魚之兆。茲屆古稀之歲。兼逢皇覽之期。是日也。萬丈翔陽。照來庭院。一天清景。飛入樓臺。人間之麋壽長春。天上之蟾明不夜。桃辰祝嘏。桂子飄香。或捧紫霞。或歌白雪。籌添東海。斗仰南山。文舉千里而遙。未附賓筵之末。十年以長。徒殷兄事之誠。向日傾心。臨風拜手。則曰方之河嶽。惟先生能副三立之榮。比之岡陵。亦惟先生庶叶九如之頌。若徒陳頤養。但祝眉梨。爲之激鳳吹於南天。酌鴛漿於北斗。而余則曰。此但知先生必得之遐齡。而未知先生昭來之微志也。鴻文無範。

貽笑方家。兕酌陳詞。聊歌下里。先生其亦粲然而喜。默然而許也乎。

愚弟陳文榮

穗垣羊石。代產英才。紫水黃雲。尤多碩彥。自昔龍光耀彩。人瑞鍾靈。每因鳩飾像形。天年錫嘏。羨伏波之矍鑠。瞻商皓之鬚眉。白香山醉舞婆娑。榮啟期酣歌洒脫。自有真樂。無待諛言。至如丹授八公。浪說化童之術。星降五老。誰誇遊渚之祥。迹恐涉於荒唐。事或訾其怪誕。要不若爲善士自求多福。有盛德必致修齡者。大有人在也。吾鄉平山馮先生。盆允耆英。穎

川望族容貌奇偉才識優良少讀父書詩禮早嫻鯉
訓長營商業橐囊屢積鯨文而溯其發軔之初脫穎
之始謀生暹埠叨賞富人。不棄糟糠。宋宏久傳佳話。
利圖什一。范蠡轉運奇謀。涉漢水之紆迴。跨蜀山之
險阻。備嘗艱苦。何妨遠服車牛。驟獲贏餘。始覺獨饒
籌算。既東南之盡美。亦左右之逢源。雖曰人事所經
營。豈非天心所眷佑。善人是富。有由來矣。先生遂
懍多財損志之言。不惜樂善好施之舉。矜憐孤寡。周
姬昌善事陰行。軫恤鄉閭。范文正義莊廣置。其在港
也。維持醫院。蔭暍良多。其在省也。調劑善堂。賑飢不

少。保存勝蹟。築往哲之公園。團結同心。組華僑之商會。凡茲美舉。見義勇爲。僉曰。微先生之力。不及此。先生嘗有志興學。攷察教育。見所設之學校。規制所在。大不如人。責任攸歸。盡其在我。乃一意倡辦。於本邑創立貧兒義塾。平山學校。職業學校。於香江創立男女義學者共三校。其助廣州興學。則捐高等師範附屬小學建築費。又捐助香江大學堂基本金。閱書樓購書費。漢文大學經費。以襄其成。尤卓著者。在本邑創建景堂圖書館。置立銅像。以紀念先人。不忘本也。計前後所費。不下七十萬金。先生若視爲固

然而絕無吝色。猗歟盛哉。蔑以加矣。宜乎積善之家。聿貽福蔭。明德之後。必有達人。喜喆嗣之挺生。振家聲而不顯。文科升學。士衡與士龍齊名。德藝兼優。元方與季方競爽。敘天倫之樂事。博寢門之霽顏。今年夏曆秋節。越三日。爲先生七秩壽辰。誕紀懸弧。恰屆從心之候。歡聯晉爵。好誦介眉之詩。有子承慶。同人觀禮。簪裾滿座。珍錯肆筵。甚盛集也。芳喬等忝屬知交。素聯鄉誼。數籌東海。獻頌南山。雖俚語之。不文。惟實事而求。是方冀春秋未艾。稔知齒德俱尊。從茲晚節猶香。永啖蟠桃之菓。藉使家風世守。長留大

樹之陰。

趙芳橋龔容漢林國安馮華炳馮賢彬

蓋聞書稱五福。聿美遐期。詩詠百宜。惟推洪算。德之厚者。心自廣。善之積者。慶有餘。既潤屋而又潤身。斯多福更增多壽。康強逢吉。非休徵相逼而來。耄耋期頤。實造物因材而篤。是以馬伏波躬耕致富。實成興漢之功。范少伯畜牧起家。猶是沼吳之策。一則精神矍鑠。一則歲月優游。各著令名。同徵壽相。故在市井。則爲小試。在廟廊。卽是宏猷。雖所遇於世者。或殊而所得於天者。自厚。如平山先生者。順志葆貞。和光

抱璞松姿在望。葵向彌殷。恭維先生魯國靈光。商家泰斗。孝友篤於天性。行知根自古人。家世清華。襟懷卓犖。世稱篤行。並通德於鄭門。室有遺經。比宜春於左里。早年勤學。披王氏之青緗。壯歲謀生。負朱公之奇策。農有粟而女有布。咸資易事通功。天之生而地之成。羣仰應時候物。總出機絲之緒。經緯萬端。全歸掌握之中。利市三倍。古心古貌。先人之遺矩猶存。實行實修。有道之令聞無忝。古有西州大賈。南陽行商。高士韓康。隱身於賣藥。名賢膠鬲。寄跡於魚鹽。方我先生。其揆一也。且也穆穆守和。孳孳爲善。雅量

如黃叔度。千頃波澄。功德若陳太丘。一山桂馥。遇大事則急公好義。鄭人喜有弦高。敦朋情則多與分金。管仲欣逢鮑叔。范堯夫麥舟之助。寶禹鈞遺金之還。德僅耳鳴。事難指數。宜其植鴻基於不朽。市廛仰爲偉人。緜鶴算以無窮。杖履望如僊客。蕃祺翕受。第祿駢臻。今年八月十八日。爲先生七旬榮慶。凡有絲蘿之親。與夫金蘭之誼者。羣謀祝嘏。以佐稱觴。夫魯侯作宮。奚斯有頌。晉卿成室。張老有詞。莫不假手微言。傾其惓臆。是飲酒落成者。猶有美奐美輪之贊。豈奉觴上壽者。轉無祝鯁祝噎之文。際茲懸弧令旦。攬

揆良辰祥開益壽之花。瑞獻安期之棗。羨香山之九
老。畫裏生風。看瓊島之三峯。人間春永。瀛洲金菜。長
生之藥何窮。壺嶠芸蓬。扶老之枝自長。况值海宇承
平。閭閻殷富。國家奠有道之基。人民享無彊之福。喧
闐闐。懋遷有無。雜沓梯航。交通貨賄。喜舒長之化
日。映炳朗之壽星。屏敞晨霞。壺凝春酒。望南天弧彩。
嘉賓爭鳧舄之趨。傳東海瑯瑤。僊子譜蛻裳之曲。酒
斟北斗。悉是瓊漿。桃獻西池。無非僊果。士欽夙企高
風。恭逢盛會。雖霍光不學。周勃無文。王子安之腹藁
已空。江文通之夢花早謝。圖僊佺之像。筆愧寫生。和

啟期之琴。歌慚鈔襲。然而先生之修道養壽。美意延年。藹藹眉梨。休休大度。客皆鼓舞。歡傳海屋添籌。余亦眉茲。竊效華封致祝。泰階景運。願丙丁之極耀。常輝。絳縣疑年。卜甲子之算籌靡盡。

諫壁倪士欽

蓋聞醴泉萬斛。匯自璇源。芝草九華。產由瓊圃。故知集嘉祥者。必由積善而來。錫純嘏者。例有敬明之德。匪徒頌邀天保。侈日月之恆升。望屬古稀。羨精神之矍鑠也。我平山馮老先生。幼承家訓。度越時流。慕少伯之爲人。得計研之上策。始則梯山航海。試服賈

於南溟。已而笮馬。犛僮。載馳驅於西域。凡轉物候時之略。阜財通貨之規。靡不胸藏智珠。手如天馬。由是起家。禹莢。奮跡巴渝。潼布芋田。富奪王孫之席。高樓連閣。業追樊重之踪。此則先生資富能訓之根因。行道有福之張本也。先生以爲植殖自封者。不過邱里之雄。積善爲寶者。別有恢奇之行。遂乃休神家術。行善以陰。造福鄉邦。蔭人於暘。維桑與梓。慣蒙子敬之困。贈李投桃。不鑽王戎之核。仁聲遐被。陰德耳鳴。買絲者爭繡平原。待餼者都歌皇罕。自此爲里祭酒。墨子之突不黔。救災恤鄰。秦伯之舟屢汎。平章荒

政澤鮮哀鴻。挹注西江。州無涸鮒而先生猶歉然其未足也。以爲粟帛之施有限。而詩書之澤無窮。生民之難愈者唯愚。君子之愛人也以德。用是篤志作人。殷勤興學。恢宏三舍。崇慶歷之規模。措置千緡。造檀橋之館宅。務使千間廣廈。庇寒士以歡顏。百年樹人。蔚譽髦而大起。此則人來蜀郡。都沾文守之薰陶。地異辰陽。同荷宋均之教澤。可不謂能急先務。無愧古人者歟。或者疑先生義可以矜式閭閻。才可以平劑豐歉。何不一麾出守。試領魚符。必能百里宣猷。聊舒驥足。而不知先生以白望之家風。視朱丹如

土芥。不製尹何之錦。惟貪晏仲之楹。李公擇之山房。
捨遺書萬卷。趙中令之巾篋。儲論語一篇。凍筆昏燈。
辛同下士。雲籤寶笈。得卽貽人。此又趣比河間。以行
善爲最樂。清同管幼。聞呵殿而不窺。其匡濟也如彼。
其樹德也如此。宜乎噓其善氣。衍作吉祥。種厥仁心。
蒸爲戩穀。是以庭森玉樹。階茁瑤芝。會食皆龍。不羨
荀家之八趨庭。是鳳。竟符薛氏之三。茲當杖國之年。
敬值生申之慶。斑氏燦錦。歡騰萬壽之觴。仙醴流霞。
合祝三秋之嘏。耀棠親承杖履。近接儀型。旣聞陶牧
之家風。敢秘徽言於簡冊。丹崖日麗。宜陳朱萼之篇。

綠野堂開喜賦白華之句。所願赤城霞起。長開四照之庭花。將令絳縣春生。永秀萬年之仙草。

晚生三水李耀棠

夫嵩高峻極。匪假培塿以稱奇。海若汪洋。詎借潢汙以施澤。則樂府進壽人之曲。曷用文繁。菊泉傾仙客之杯。寧須辭費。然而麥邱之祝。鳴遊聖於齊廷。燕喜之歌。聆歸昌於魯頌。推之千秋萬歲。不少脣飾之談。二首六身。競作神奇之說。當捧觴而上壽。咸敷衽以陳詞。况夫爲仁由己。戒慎是耄艾之徵。積善成家。博濟享期頤之福。高允陽報之論。期以百齡。于公陰德。

之談容其駟馬。是知福者備也。備則反求諸其身。壽者酬也。酬則克昌於厥後。因高門之戩穀。證天道之式憑。豈但臺萊獻頌。進趙武之徽言。竹葉泛觴。作淳子之鞠脰而已乎。平山馮老先生者。稟靈河嶽。孕魄星辰。語乎姓氏。則大樹之勳業常新。溯厥里居。則白沙之流風未遠。爰在髫齡。已驚父老。任昉之金鈴。個個繫自前生。高琳之浮磬聲。關於夙慧。假使笙簧於典籍之場。棲息於詞章之圃。固將輿臺屈宋。較轢班張。杜預爲左氏功臣。蕭該作漢書宗匠。無如鶻啼洛下。識地氣之漸遷。蛇鬪城中。瞬近憂之交集。當

勝朝遷鼎之會。正萬國款關之時。雲車風馬。不煩博望之槎。金罽文螺。遠過公超之市。先生蒿目時艱。棘心世變。知膠柱鼓瑟之非計。而趙括不可徒讀父書。悟臨淵結網之可乘。而弦高於是遠適異國。初試鋒於羅斛。旋返旆乎巴渝。梯山航海。燭變化於幾先。笨馬棘僮。極轉移之妙用。遂能業操勝券。家號素封。宛孔氏爲南陽羣商所推。何細胡以西州大賈爲號。然此猶先生之功業在己。而未及先生之德澤在人也。則有城駐五羊。海飛九鳳。歲維紀乙。運值呼庚。人如杜甫。爭拾橡粟以充飢。世鮮黔敖。孰具饗飧。

而待食。先生告糶齊封。未具臧孫之圭磬。擬輸秦粟。待籌遵路之薪芻。事已急於燃眉。情難安乎袖手。何幸秦公歸帑。夙緣信義見推。因而汲黯開倉。得以便宜從事。春回大地。頌徧殘黎。鄭俠流民之繪。從此輟觀。善明續命之田。長聞頌德。又若香江當癸丑之交。金市值恐慌之會。山崩銅穴。鄧通百計以難縫。星暗天錢。呂尙一籌而莫展。先生是時首揆東華。綜稽出納。息謠言以維大局。則院款弗提。昭大信以安衆心。則家財可質。金輕風籜。義重嵩衡。闔闐倚若長城。雨雪因而見覘。欽其度者。以爲安石圍棋。惟靜也。

足以制羣倫之動。佩其德者。以爲東平好善。惟誠也。足以召天地之和。然此猶先生之澤及於一時。而未及。先生之惠流於永遠也。夫英才教育。孟子有三樂之談。小子裁成。孔門重四科之選。先生抱道在躬。嗜才若命。吐哺握髮。有姬公待士之誠。夏雨春風。得管氏樹人之術。簡篇鱗次。捐書之費崇山。黌舍雲連。興學之金瀉水。名教資其保障。衆譽因以歸高。旣而奮翅邱園。邁車歐美。訪他邦之勝蹟。吸外族之文明。波斯敦畔。是華盛頓蹠踔迅厲之場。滑鐵盧邊。亦拿破倫叱咤喑鳴之地。神工鬼斧。品直稱仙。峻宇

雕牆城真似錦。物競天擇。非關抑已揚人。抉本尋原。亦在勸教興學。於是滄海歸來。益菁莪之樂育。大鈞鼓化。在埏埴以無言。接趙衰之日。樗櫟欣其向榮。聞伯夷之風。頑懦莫不興起。且先生尤有不可及者。望齊山斗。人倫既奉爲楷模。品重圭璋。天性更徵其純摯。閔予同氣。則姜家之大被常溫。厥念相莊。則桓氏之新衣不御。以至請捐義賑。不煩馮煖市義於薛中。謝絕虛榮。直類梅福逃名於市上。貞貞徯福。翼翼考祥。固宜賈稱三虎。叶雅奏於壘簾。荀號八龍。邁英聲於髻鬣者矣。僕於往秋。獲交猶子。側聆緒論。已知

大阮之賢。比奉教言。益切荊州之慕。值懸弧之吉日。當杖國之良辰。桂飄香樹。看人月之俱圓。樂引仙墩。聽雅南之迭奏。所冀伏波矍鑠。常傾此日之樽壘。奚辭張老頌揚。再備他年之篇什。

愚世姪黃可立

書言五福。壽居其先。然而壽不易致也。孔子言仁者壽。又言大德必得其壽。故壽必根諸仁與德。有博施濟衆之功。而後有耄耋期頤之算。有整躬修行之道。而後有竹苞松茂之姿。若平山馮老先生。卽其人焉。先生起家自商。然非其所志。凡日夕所規擘。而

汲汲每若不可及者。惟在教育之一途。綜其前後所出。若創立學校。若建築圖書館。蓋逾數十萬金。故今之言興教育者。必推曰馮氏。雖然。先生之爲人。則劬矣。而爲己之學。尤不可及。僕嘗得先生所贈格言聯璧一書。觀其內容。知先生揣摩於是書者。爲至熟。先生之有得於是書也。爲至深。易稱謙謙君子。卑以自牧。其先生之謂歟。自清季以還。士大夫皆奔競於利祿。幾不知道德爲何物。而先生則踐道以激勵之。自海禁大開。舉國患貧。繩樞甕牖之徒。往往不能具束修之費。以謁見先進。從而考德問業。

而先生則竭力以栽培之。凡先生之所爲皆有
關世道人心至大。先生之自待爲何如。世人之有
待於先生者又何如。然則先生之年登杖國老
而彌健者。非幸也。宜也。僕不工頌祝之詞。謹於先
生懸弧之辰。臚舉生平事實之大端。以爲先生壽。

愚世姪羅振萍

公爲當代之偉人。而商業之巨子也。少膺庭訓。夙負
英才。長事懋遷。共驚神策。挾陶朱之妙術。遠涉他邦。
考歐美之菁華。關心故國。糟糠不棄。守義效鄭。忽之
辭婚。財帛爲輕。救急若卜式之輸粟。信義孚於中外。

德澤徧乎西東。總總災黎。咸沾恩惠。莘莘學子。多被栽培。允宜年登壽域。歌詠九如。名馳遠東。芳流百世。顧復聿崇經術。救道德之將淪。設學興文。挽狂瀾於已倒。此真不愧偉人之譽。無慚巨子之稱也。萼雲夙切葵忱。情殷燕賀。叨依樾蔭。感戴鴻慈。歌杜甫之句。識老人之有星。獻魯昭之章。知眉壽之靡艾。期頤百歲。祝此生辰。君子萬年。宜其永壽。謹序。

愚弟簡萼雲率男華孫慶孫偉孫錦孫公立偕孫成宗德

宗世愚姪簡慶孫撰書

蓋聞華嶽峯高資屏藩而作障。老人星耀照寰宇以

流輝。鴻福克備乎箕疇。鶴壽復傳於菊水。光分南極。同人共祝松齡。時慶西成。小子彌欣藻頌。如我平山舅父大人者。夔哉尤稱四海同欽。一堂集瑞者乎。先外祖景堂公。未接光儀。夙欽道範。讀言之遺錄。足矜式乎後生。舅父繼軌華年。蜚聲綺歲。挹象山之紫氣。振能海之銀濤。鯉庭之訓克敦。雁序之情亦篤。洎棄儒而服賈。遂去粵而之暹。時則暹埠富人。以公年少才高。德優行美。有女欲奉爲箕帚。歸裝並厚予金錢。公則辭以稟命之言。守乎下堂之戒。不貪爲寶。馮驩何歎無家。竭力養親。考叔惟知有母。

未幾涇河返棹。夔府登程。歷錦水之游縱。訪巴山之勝迹。烏棧之層巒幾度。猿蹄之絕壑曾經。靡弗挹彼菁華。歸吾領袖。遷貨居於東粵。市列百廛。通航路於西川。舶來千品。億則屢中。端木賜騎駟稱饒。利貴逐時。陶朱公江湖致富。迨至榮旋錦里。名重香江。驚羊石之塵飛。慨鵝湖之道廢。商量舊學。蹲龍揚壁水之波。培養新知。飛兔躍環林之秀。圖書闢館。揚祖德卽闡儒風。學校如林。育後進以綿聖澤。而且澆風勉革。訓俗則特表遺規。化雨遍沾。格言則使觀聯璧。推之白沙園圯。洗硯池荒。莫不重煥岩廊。增光壇坫。保先

賢之矩矱。啟後學之津梁。蓋學以儲材者。公之心。積而能散者。公之德。故能使圓冠方領。髮繫千鈞。倉頡佉盧。爐同一冶。風行草偃。牧豎亦解聽經。梓敬桑恭。鄉里咸知稱善。而况士商延譽。中外傾心。凡舉公歷任東華醫院保良局首總理。團防局紳董。太平紳士。亦皆義以服人。誠能濟物。而大學堂監理一職。定爲永遠。尤稱公之素志也。社會事業。既垂大定之規模。教育精神。復作中流之砥柱。劉向云。有陰德者必有陽報。有隱行者必有昭名。宜乎大耋綿齡。高門紀盛。喆嗣秉華。秉芬秉芹等。蚤雛鳳之聲聞。

待飛鴻之響遠。而秉華秉芬。更畢業漢文中學。考入
香港大學中文學院。二陸則雲間媲美。兩丁則鄴下
齊名。茲值仲秋。適逢初度。甥久依松柏。謹祝臺萊。仰
福慧之雙修。表心香之一瓣。好月瞻其常滿。德風頌
其永馨。體高厚於悠久。無疆。挹氤氳於冲和有節。此
日稱觴香海。何殊故鄉畫錦之堂。他年添算期頤。更
進樂府壽人之曲。

外甥李作新拜撰率男榮宗華宗光宗

白華之補詩。其首章曰粲粲門子。如磨如錯。三章曰
鮮侔晨葩。莫之點辱。孝之有取乎潔。何義也。君子將

立身顯親。以爲世範。顧以非禮之禮。養其親。謂之潔可乎。若吾同學馮君秉華。昆仲者。庶幾能潔養者也。

太翁平山先生。將老而傳秉華等。思顯其親。遂乞當世之知言君子。爲文壽之。翁固以厚施聞。復體其意。推惠於衆。戚鄰聞之。亦移所餽。以助施。而末俗之浮文陋習。悉不以進。己巳秋仲。望越三日。爲翁七十初度之辰。是日也。秉華秉芬。鞠脰奉觴。冠帶肅客。港之耆獻俊民。簪裾容裔。登堂介壽。各致敬禮而退。幼成等不敏。亦隨衆揖讓。幸躬厥盛焉。竊維古無獻壽之禮。而有養老之禮。民之生年。閭史掌之。其養

於學也。有僕有介。以昭其恭。四豆六豆。以備其文。遐哉渺乎。後有行之者。則變本加厲。或歌吹喧沸。以爲娛。杯盤狼藉。以爲樂。茲舉也。不僕介而恭。不觴豆而文。不歌吹喧沸而娛。不杯盤狼藉而樂。闇而章。衍衍而相羊。其斯爲君子之光也。若翁之盛德懿行業。詳於增城賴先生文中。今不復序。序其養之潔而中於禮者。以爲世法。

世愚姪李幼成吳仲興劉國素黃蔭鈞蘇曾懿鄧以漢周光銘

乾坤正淑之氣。鬱爲地靈。松柏永茂之徵。傳爲家慶。

是翁矍鑠。遂上承無疆之庥。當代者英。豈別擅長春之術。此蓋德由自樹。福乃天申。夙種靈根。載登壽宇。應三星而度世。領袖羣推。慶七秩而稱觴。箕裘濟美。香飄丹桂。老人映南極之輝。菓獻蟠桃。王母會西池之宴。歡騰鳩杖。樂舉兕觥。比呂尚以延年。擬陶朱而紹業。飲且食。壽而康。其我平山老先生者乎。先生岡州碩彥。嶺海仁人。性稟慈祥。行敦友愛。興學業。富營謀。走川渝而鴻爪留痕。之暹羅而蠅頭獲利。往來統夷夏之交。賓主盡東南之美。卅餘年不辭勞瘁。十萬貫奚止腰纏。尤復儉德自持。樂善不倦。其倡辦

學校也。少者懷思。其整理善院也。貧民戴德。瞻彼濫
樓。僉荷忻懽。然其善舉。豈此已哉。旣積厚以流光。多
種因而獲果。宜乎 喆嗣秉華。秉芬學兄。由官立漢
文中學而進大學。同時畢業。指日成名。兩美增榮。四
方艷羨。少公子秉芹。幼而歧嶷。長益崢嶸。可貴難
能於斯爲盛。人以爲川嶽之鍾毓。晚以爲門戶之禎
祥矣。仁者必壽。大聖人言有徵乎。今者八月十八日。
欣逢 令旦。甫度中秋。桂馥更喜蘭芬。月好正當人
壽。裙裾霧集。同修祝嘏之儀。簪笏雲屯。共侑祈年之
爵。中壽洵臻上壽。文子預卜文孫。慶溢華堂。句詠鹿

鳴之什。歡臚香海。詞申燕賀之誠。是爲序。

晚生衛啓明

文以載道。紀實錄也。今平山先生七秩榮壽。而有徵文之舉。甚盛事也。考頌揚之文。華封三祝。爲文最古。厥後詩有二雅三頌。類多形容盛德之章。史漢有讚。班氏爲讚。多用論體。後人多用韻語。至歌頌德功。採及瑞應。謂之符命。六朝最盛行。迨宋有樂語。其體制先文後詩。他如言行錄及各小傳。雖一行之奇。一言之善。靡不具載。輜軒之採。所以傳頌古今也。矧平山先生齒德俱尊。其守身則常凜冰淵。其應世則

樂善不倦。觀其糟糠不易妻。暹富人欲妻以女。遺以金。先生能婉謝之。其廉潔之操有如此。省政府屢欲聘爲顧問。均不受命。其高尚之風又如此。馮文簡之貞操。可稱有象賢之孫矣。至於由暹至蜀。風塵勞苦。牽車服賈。遂成鉅富。馬伏波殖貨財貴。施賑之語。先生當之。可以無愧。溯先生爲廣州方便醫院。及各善堂董事。爲社會服務。不遺餘力。公爾忘私也。其在邑。建祚祥祖祠。以奉妥先靈。建景堂圖書館。以紀念先德。孝思不匱也。邑中象山公園之養拙亭。白沙公園之嘉會亭。建築費一身任之。不忘典型也。迨

後移居香港。任東華醫院保良局總理。團防局紳。大學永遠監理。太平紳士。及倡辦新會僑港商會。凡諸公益之舉。可爲衆人謀幸福者。知無不爲。有范堯夫之好施。具文彥博之丰采。宜乎僑胞矜式。外人拱手也。綜計先生義舉。前後善款七十萬有奇。而學務尤占多數。如廣州高師附屬小學捐助鉅款。邑城之貧民義學。職業學校。香港之男女義學。孔聖會中學。大學堂捐款。書樓購書。兢兢以興學爲急。誠知所先務矣。懿歟休哉。積善之家。必有餘慶。資富能訓。惟以永年。際此介眉載歌。稱觴上壽。晚等效華封之祝。倣

樂語之體。爲文而詠之。以詩。

頌獻南山七秩逢。咸懷大樹仰喬松。祥膺五福徵洪範。慶祝三多羨華封。修行綦嚴金作礪。引年寵錫玉爲筇。月圓花好人同壽。翹企芝輝切景從。

中華教育研究會主席劉玉璠副主席劉尙志李珣精暨

全體值理部同人等南海劉尙志撰南海劉壽年書

六經頌揚之文。莫多於詩。其所以形容盛德。闡發休美。悅之故言之。言之不足。故長言之。長言之不足。故詠歎之。使人流連不置者也。馮公平山樂善不倦。齒德俱尊。久矣。口碑載道。惜後世無太史輜軒之採。

草野無頌禱之吟。三百篇之旨。微盛德幽光。曷足以昭諸來許。遐思夫風詩首篇。詠文王之德。起於閨門。先詠聖女妣氏之配。卽馮公糟糠不易妻。婉却暹羅富人女以女。遺以金。古道克敦。有如此者。有聲之編。言文王遷豐。武王遷鎬。而曰匪棘其欲。遙追來孝。卽馮公以暹地未足展其驥足。乃過武漢。踰三峽。入巴蜀。故能擅端木之才。擬白圭之富者也。懿歟休哉。積善之家。必有餘慶。資富能訓。惟以永年。其壽考維祺。以介景福。有自來矣。總馮公生平善行。其難能可貴。罄竹難書。在省任方便醫院及各善堂董事。

在港爲東華醫院及保良局總理。又膺團防局紳。太平紳士。大學堂永遠監理。其熱心公益。維持金融。爲中外人士所矜式。至若勇於從善。雖以衆謀莫就之舉。往往以獨力持之。而綽綽有餘。如本籍白沙公園。象山公園。新會商會。微公之力不及此。他如却省政府之聘。富貴不能淫。樂其道而忘人之勢。更見明哲保身。養之有素。襍祥嘏集。應之也神。史遷所謂修道養壽。豈虛語乎。可見德厚者載福。積厚者流光。誦眉壽之章。獻南山之祝。宜也。非幸也。雖然。馮公前後倡辦善舉。捐出六七十萬元。而學務尤居多數。如

邑城之圖書館、職業學堂、平山學堂、廣州高師附屬小學校、香港之男女義學、孔聖會中學、香港大學書樓圖書費、或由一己獨立、或捐助鉅款、兢兢以學務爲急。西哲之言曰：覘人國之盛衰、視國民識字之多寡。馮公有見及此、豈非善舉中之重大者乎。是故詩詠文王之德亦夥矣。而於棫樸、旱麓等篇、一則曰：周王壽考、遐不作人。再則曰：豈弟君子、遐不作人。至魯頌泮水篇、於濟濟多士、三致意焉。古人加意於庠序、誠以學務爲治國之要素耳。戴記曰：文王以文治。斯言也。可以貽贈。馮公其在詩曰：其德靡悔、旣受

帝祉施於孫子。宜其喆嗣蜚聲學海。奮翼儒林。王氏三槐。薛家三鳳。可謂後先輝映也。晚等景仰。芝輝用伸椒頌。缶鳴謹獻。瓦奏非工。藉老人之星臨。爲文友之暢會。末光叨附。所欣慕焉。又從而歌之曰。天保既定。俾戩穀受。天百祿降遐福。德之厚者流。自光如川。方至靡不足。南山之壽不騫崩。日之升兮。月之恆。巍巍乎如山如阜。浩浩乎如岡如陵。

晚生秦浩波秦仁山

星輝南極。知八千歲爲春。籌紀東瀛。喜七十杖於國。茲當秋色平分之際。欣值平山先生華誕之辰。天

上石麟。身前金粟。冠裳慶衍。山海騰歡。先生幼重彝倫。友愛篤於天性。長敦道範。知行根自古人。富不易妻。早著清聲於暹國。士各有志。曾樹偉績於川城。交四海之奇才。重千金於一諾。理財妙術。陶朱何多讓焉。貨殖高才。端木亦蔑如也。宜乎人地妙選。歷掌慈善機關。亦緣才望公兼。榮任太平紳士。扶危濟困。范公子麥舟之助貧。卹下撫孤。鍾縣令書期之嫁女。得英才而樂育。學校成林。紹文化之灌輸。圖書充棟。廉泉慨浥。俾商會賴以告成。德水重敷。使公園亦爲生色。一是皆以豪俠爲性。忠信爲情。和以與羣。而嚴

以持己廉以自處。而博以濟人。高而不危。滿而不溢。類斯懿德。尤不勝書。所謂得一爲貞。壽身壽民而壽國。持三不朽。立德立言而立功。由來純嘏。本於純仁。大年根諸大德。故知仁人必壽。陰德遐昌。矧夫李鄭夫人。少習母儀。長嫻母訓。溫恭婉孌。陶章儷其女箴。黽勉勤勞。鍾郝侔其家法。所以庭前玉樹。秀鬱參天。堦下芝蘭。芳馨滿室。此時庠序競爽。軾轍交輝。行見鸞翥蛟騰。蟬聯雀起。固無須夫諛貢而已。莫罄藻鋪矣。惟茲喆嗣。養志庭除。承歡膝下。堂開畫錦。何殊閬苑風光。膝繞斑斕。不異蓬瀛瑞氣。香飄玉顆。芬

流翠羽之觴。彩滿冰輪。明映長庚之宿。仰德星之燦爛。喜鶴算而歡呼。弟等誼屬粉榆。份應介壽。祥暉引領。倍殷燕賀之忱。俚語敷陳。虔致岡陵之祝。謹序爰爲之詩曰。

先生幼習賈。勿用抱叢殘。健刷凌雲翮。倏忽疑飛鸞。廉隅工砥礪。古道罩晶盤。義學開門逕。高足滿詞壇。口碑聽溢路。度人逾金丹。敦宗兼睦族。祖廟暈其觀。優游娛晚景。譽美勝作官。杖國恰歲屆。輿頌稱儒冠。

頌詞

己巳秋八月。平山先生七秩壽辰。冠鳥一堂。濟濟稱賀。同人忝屬故舊。夙仰儀型。當茲嘉辰。禮成樂作。不揣固陋。願致私誠。爰摳衣升堂。環而致詞。曰。瞻南山之峻極。繫葱鬱而無疆。維大德之必壽。與斯嶽而比長。溯鍾靈于紫水。迺降生乎古岡。趨鯉庭而椿茂。披蠹簡而芸香。勵躬修于三省。敦哲訓之五常。羌王孫之善賈。遂貨殖而服商。適暹土而初舉。眄巴蜀而高翔。猗頓齊其富有。計然遜其策良。矧淵淵而厚施。宜桃桃而名彰。稽歲華于乙巳。粵靈潦而凶荒。穀車

空而雀寂。灶火冷而蛙藏。鄰告災以來。糴金未至而先航。等秦舟之汎粟。邁齊廩之發棠。粒蒸民于大歉。思愷澤以難忘。迨軍興於癸丑。金融絀其恐慌。忱善款之動搖。紛衆議而旁皇。懼金歸而市駭。保公積以私囊。迴狂瀾于砥柱。返逝日于魯陽。他如象山名園。白沙遺址。簪笏娛遊。蘋蘩禋祀。歌棫樸以作人。列琳琅以餉士。仲連和而解紛。子產惠而稱美。澤衍無窮。筆難勝紀。至若剏興商會。共勉時賢。紐樞闔闐。領袖市廛。旣幹事而貞固。亦掌庫而寅虔。歷裘葛之更迭。聯聲氣以萬千。緬休明之締造。實櫛沐之開先。乃晉

而頌曰

猗者英兮杖國。忻攬揆兮茲辰。開雲屏兮錦燦。添海屋兮籌新。祝燕居兮晏晏。慶麟趾兮振振。進仙醪兮介壽。八千歲兮爲春。

華商總會同人李亦梅葉蘭泉梁弼予譚煥堂余焯生鄧志昂鄧肇堅陳香伯李煜堂馬應彪何世榮陳碧泉李耀堂葉履剛梁仁甫高良和老潔平何世耀簡英甫林護伍華伍于簪何世光何爾昌伍于瀚蔡興蔡昌馮香泉馬祿臣黃錦英蔡寶耀何曉生關樹宗黃蘭生何世亮洪興錦王國璇陳符祥陸蓬山何世奇李自重羅文惠羅文顯陳樹楷周星池蕭垣何華生鍾禮庭譚雁湖陳鑑波鍾熾南鍾惠林麥遂初馮蘊之陳夢熊陳卉曾潘碧池馮宣甫蕭浩明周文揚裕生源存德銀號五洲銀號

馮平山先生七十壽言彙錄

維民國之十有八年秋仲。爲慶祝平山翁馮老先生七秩嶽降之辰。禮也。夫疇陳洪範。高年冠五福之先。鄉列賓筵。尙齒居四民之首。是以仰青城之仙吏。幾歷春秋。問絳縣之老人。渾忘甲子。自來碩德之士。必獲耆年。未有餘慶之家。不由積善者也。而況地靈人傑。篤生應南極騰芒。花好月圓。樂事趁中秋令節。如我平山先生者。懿歟盛哉。先生見義勇爲。樂善不倦。壽人壽世。不伐不矜。故能以文潞國之精神。兼郭汾陽之福澤。宗少文乘風破浪。少時而萬里壯遊。范大夫握算持籌。中歲而五湖寄迹。至於蠶叢闢

路計奇通雲棧瞿塘。泊乎鳥倦飛還。貨殖徧香江珠海。關心教育。敬恭而誼。重梓桑。滿目孤寒。周恤則界無秦越。視彼穆公發糶。大義尤高。比諸卜式助邊。輸財更廣。枌榆舊蔭。芸編增鄴架之光。桃李新陰。廣廈慰杜陵之願。修厚德者膺厚福。積大善者享大年。用是身獲遐齡。功侔大造。固無俟術參金匱。秘傳不老之方。經誦黃庭。別覓長生之訣。今者泉流菊井。黃花添晚節之香。觴啟桃筵。皓髮表壯顏之健。承歡繞膝。子星孫星。祝祐介眉。今雨舊雨。定躋期頤於天錫。豈惟多福與多男。欣逢矍鑠之人豪。業已杖鄉而杖國。

同人等鳧趨跡阻。兕酌心傾。慶介祉於芝田。喜延年於椿樹。筵開玳瑁。遲陪北海之樽。走并馬牛。快上南山之頌。謹合詞以祝曰。

平陽之精。山嶽之靈。大樹世德。是誕耆英。皤皤黃耆。體健神清。聿修厥德。不居其名。宜爾子孫。蘭玉蜚聲。天錫爾純嘏兮。長與喬松日月而爭榮。

新會邑城愛羣善院主席呂植三敬撰暨董事謝侶彝張

柱臣陳耀石張子衡陸銳世何子岑梁紀常何藻庭張夏

卿何丹葵黃承璇譚佐吾陸焯南何月池岑日初劉毓雲

陳瑞祺陳傑卿胡錫瑛鍾傑卿高亮清呂佐平馬斗南馮

景山劉性初李美聞戴心海何蔚霞陳月川朱挹裘劉覺

民伍杰臣呂興仁何灼庭何仲褒區善培湯偉庭趙棟臣
張弼臣鍾汝琦何耀庭林渭川潘德立廖伯義周瑞芝李
澤芸劉允鑣劉維榮何魁任張紀榆李小舟梁榮黎碧軒
林芝鄭良英許坤臣趙棟垣馮申沃何炳燦李子唐何虎
臣周春林梁國賢梁承熙梁聰林時安李學靄李擢南劉

維瑞余和傑等

維中華民國紀元十有八年。歲次己巳。中秋越三日。
爲各界發起聯祝我平山老先生七秩壽慶之辰。
惟時堂開畫錦。天放麗晴。士女星羅。耆英畢集。煥等
忝廁善席。屢荷宏施。爲公爲私。烏可無一言以紀其
盛。爰隨青鳥。竊分王母之桃。并代蒼生。敬效華封之

祝。其詞曰。

公家上黨。代起異人。孟嘗焚券。毋乃前身。聖哲所遺。人廢我興。狂瀾獨挽。吾道干城。百年之計。孰比其功。華南桃李。同醉春風。哀鳴鴻雁。無地無之。富人孔多。微公誰依。公能壽民。民爲公壽。何以壽公。金鑄絲繡。今次壽公。杖國之期。再三壽公。直到期頤。

四邑明善醫院主席余煥南暨同人等

維中華民國十有八年秋八月十八日。爲各界恭祝我平山馮老先生七秩榮壽之期。冠蓋雲屯。歡聲

雷動論者謂陰德及物獲天厚施。浩浩春秋。綿綿歲月。正未有艾也。煥等忝附善席。景仰慈航。爰借北海之樽壘。共上南山之頌禱。其詞曰。

公膺上壽。古來所稀。公抱宏願。樂善不疲。少壯航海。閱歷精深。富而好禮。人奉南針。一言之重。可救歲災。一家之券。可通市財。愛國精神。專注教育。或獨支持。或攸興築。館集圖書。中西貫徹。殫見洽聞。以惠後哲。凡百善舉。靡不勇爲。重視人命。尤在設醫。中外醫院。咸資助理。施及四邑。病創俱起。天地好生。能合其德。大地回春。胥登壽域。同人有志。棉力不逮。藉沛恩

波源源永繼。德愈無涯。壽愈無量。頌上九如同聲歡
暢。謹祝。

江門崇善堂主席余煥南暨同人等

維中華民國十八年夏歷八月十八日。恭逢 馮平
山先生七秩榮壽。謹拈詞以頌之。詞曰。

孔稱仁壽。厥爲 馮公。華洋馳譽。德望豐隆。術擅懋
遷。信同季布。古道克敦。善人是富。購米賑荒。誠感商
場。飢民存活。若獲慈航。公局善院。歷膺紳董。不讓當
仁。豪懷獨勇。建祠祀祖。築館藏書。孝思不匱。型族式
間。喜觀格言。入德進道。好善樂施。矜恤無告。興國之

本教育爲先。慨捐鉅款。善舉空前。學院蜚聲。蘭馨桂
茂。嘏祝無疆。奉觴上壽。

愚弟馬永燦

中華民國十八年夏歷八月十八日。馮平山先
生七十攬揆良辰。天錫純嘏。應賡介壽之章。人慶大
年。合上九如之頌。爰摛俚語。祝擬華封。詞曰。

懿維馮公。岡州望崇。僑商鉅子。道德之宗。少而岐
嶷。晚成大器。富貴浮雲。糟糠不棄。積財好施。賦性仁
慈。痼瘵在抱。已溺已飢。港市金融。偶然騷動。賴公
以安。人羣推重。宏興教育。慷慨輸將。積德貽謀。厥後

克昌。歲在己巳。祥開盛事。壽祝遐齡。永膺庥禔。

愚弟馬應彪

維中華民國十有八年。歲在屠維大荒落八月戊辰
穀旦。迺平山先生七秩榮壽大慶。先生生平酷
愛書史。篤志力行。好施樂善。於育材興學。尤具熱心。
非古所謂善人是富者乎。誠漢忝屬知交。信之彌篤。
故有不能已於言者。

值民國己巳中秋之候。迺馮公七秩古稀之年。溯
經營于早歲。歷江漢巴蜀而懋遷。自遠游而返國。羸
十萬之腰纏。建景堂而留紀念。垂於後以光前。旣輸

財於善舉。尤致力於興賢。積善之家有餘慶。宜乎瓜
瓞之緜緜。德之厚。斯流光自遠。福之至。實有開必先。
欣欣然若春松之茂。皎皎然爲秋月之圓。備極人生
至樂。洵稱貴壽雙全。躋公堂而祝嘏。相與結文字
之因緣。

愚弟蘇誠漢

維我馮公。德稟於天。紫水毓秀。白沙景賢。少而力
學。長乃懋遷。名齊猗頓。智邁計然。賑災雀躍。興學蟬
聯。園開梓里。館列芸編。緬茲善舉。宜獲耆年。一觴春
酒。壽祝彭錢。

世愚姪周敬輿馮松卿楊濯西馮文鍇李家普李兆階李

家恕駱錦機趙國成謝壽頤趙國駒吳振聲陳本生

中華民國十八年己巳八月十八日。迺平山世伯
七袞大喜之辰。戲綵衣於階前。稱兕觥於堂上。仲秋
望越。樂敘天倫。甚盛事也。世姪躬逢盛典。與有榮施。
爰表感情。聊申頌禱。祝曰。

普慶千秋。桂魄香留。惟留懋德。馳譽岡州。致富有基。
寓暹持籌。逮歷蜀漢。展厥大猷。旣富方穀。慈善慮周。
地括華夷。聞譽最優。方便門開。美不勝搜。公園接踵。
人樂遨遊。旅港商會。羣願詢謀。興學助費。圖書滿樓。

數十萬金。善舉誰侔。友愛性成。道德交修。有德則樂。百福來求。以介眉壽。春酒香浮。魯有單豹。德容與儔。積善餘慶。奉觴以酬。謹祝。

世姪陳冠卿仁階良勳良烈良樵良熙良熬良庶良庶良

燕良羔

公當髫齡。人稱大器。未及弱冠。乘風萬里。初至暹羅。發軔經商。幡然迴棹。改絃更張。沿江踰漢。遂入巴渝。駕七寶市。窺八陣圖。老當益壯。遠遊歐美。吸收文明。研精物理。善賈多財。秉心綢直。倘遇龍門。傳登貨殖。黃標紫標。視非私有。不已於豐。而物於厚。孳孳好善。

成自天性。匪功是伐。匪名是競。醫院善堂。羣資挹注。義粟仁漿。慰彼黎庶。乙巳歲荒。米船梗阻。借重鼎言。遂操量鼓。癸丑軍興。泉刀困滯。質券救時。朱提通濟。教育經營。悉殫心力。無小無大。是培是植。既助衆擎。尤多獨舉。徧地陽春。四時化雨。圖書設館。縱覽其間。閣殊天祿。地宛瑯嬛。峨峨銅像。以展孝思。於穆皇考。陟降在茲。海濱鄒魯。地以人傳。公園邳拓。景仰前賢。翼然有亭。象山岬嶼。大智若愚。何妨養拙。箕疇五福。以壽爲先。如斯碩德。允享大年。人生七十。古來所稀。優遊杖國。罄無不宜。回憶壯歲。故劍是守。却妾辭金。

齊大非偶。惟孝友于。深念鞠子。遺金滿籬。脫如敝屣。積年彌高。積德彌劭。服膺格言。古道恆照。矧矧律已。藹藹親人。虛懷若谷。和神當春。我忝葭莩。相謂爲亞。情話往還。歆然謙下。今逢初度。喜溢梨眉。酌以大斗。禮亦宜之。公安恬淡。命曰不可。幣之未將。無煩瑣瑣。爰掇蕪詞。藉伸慶祝。壽寓悠長。以介景福。

襟弟鄭榮瑞率男兆沾兆濟孫洪新

古稀之年。蟾圓之日。壽開南山。曷其有極。恩被貧苦。德及故舊。教育熱心。善舉盡力。繞膝承歡。天人共慶。九如善頌。百福是積。大德必壽。亦康亦寧。敬書數行。

素懷已闢。

外姪甥孫鍾根石

維己巳中秋後三日我平山姻眷兄馮老先生七
秩初度之辰。蘭陔潔養。萊綵承歡。甚盛事也。慕仁永
好朋樽。依光戚里。謹抒藻頌。藉侑桃觴。其詞曰。
始平世蔭。大樹家聲。載揚前烈。稟質瓊瑩。幼通儒術。
藝苑抽萌。有懷投筆。破浪重瀛。輕颿抵暹。初展鵬程。
懋遷有道。貨殖書成。顧瞻巴蜀。杖策西征。棘僮竿馬。
操算奇贏。希蹤范蠡。三徙成名。眷懷鄉土。桑梓言情。
滋培善果。槁葉敷榮。救荒輸粟。頌滿羊城。軍興避地。

香島移旌。東華首席。虛左相迎。保良建策。團防請纓。
華僑托庇。同我太平。捐資慷慨。義重財輕。比閭族黨。
先事經營。制隆寢廟。畫棟雕甍。校開職業。惠及編氓。
既興鄉學。教育斯宏。培才都會。莪蔚菁菁。霑濡海島。
多士葵傾。劬扶聖學。正道昌明。作人壽考。履泰心亨。
天與厥福。永保安貞。德垂後裔。玉樹風清。樓前花萼。
跨美田荆。堂開畫錦。酌兕稱觥。星瞻南極。輝映長庚。
賓筵雅集。簪笏門盈。霓裳同詠。鳳管鸞笙。好承投李。
慚乏報瓊。竹林啟秀。喜締鴛盟。躬逢盛會。洛水耆英。
俾期而艾。接踵彭鏗。

姻眷弟麥慕仁率男祿欣慶欣熾欣濂欣孫博強博明博

暉博通

文起八代之衰。道濟天下之溺。後世傳頌韓昌黎者。茲於馮公平山。亦將本斯義以彰斯德。公七十壽辰。其生平賑卹災黎。維持金融。諸盛烈。一時名公鉅子。知必有詳述之者。末學後進。何敢更贊一詞。惟忝屬大學生徒。對於捐款興學一端。尤深景慕。夫中文胚胎於數千年前。舉凡道術科學。無不闡發無遺。慨自經書厄於秦火。儒術厄於六朝。典制厄於帖括。代有通德。力挽狂瀾。今則異學爭鳴。邪說橫議。假村

夫之俚言。藉文淺陋。翻前哲之讜論。競侈新奇。道義棄如糟粕。文章皆成爛部。中文之晦盲厄塞。未有甚於此時者也。公獨慨然振興。倡辦義學圖書館。不遺餘力。香港大學中文學院。賴公贊助之力尤多。并令二子入學肄業。以爲先導。續絕學於一線。繫國粹以千鈞。異日中學昌明。車書大同。公之名當與之並昭日月。公之年當與之並鞏山河。不禁切高山之景仰。效華封之三祝者矣。爰爲之頌曰。舉世混濁。曲學鴟張。闢邪反正。繫公是倡。恢宏大學。追踪漢唐。耆年碩德。俾壽而昌。

香港大學學生周覺識

維己巳年八月十八日爲平山世伯七袞榮慶。冠

英夙仰心徽。用綏眉祉。願進吉詞。以侑康爵。爰爲之頌曰。

老人星耀。近於文昌。爭光日月。奎璧爲章。猗歟我公。興學名揚。莘莘庠序。億萬縹緗。壽考周文。作人樂育。金玉其相。同茲介福。百年期頤。如日之旭。慶衍桂蘭。無疆用祝。

世小姪潘冠英

詩歌

平山先生熱心教育。中山大學附屬小學。前承捐資建築校舍。故校中有平山堂以紀念。今先生七秩良辰。謹賦四章。以伸慶悃。

秋風颯颯桂飄香。攬揆良辰福履強。鶴算方聞增綺甲。蟾宮正值詠霓裳。指困濟衆慈雲蔭。興學儲才教澤長。處世不欺培厚德。期頤預祝壽而康。太邱道廣重當途。市隱籌謀著楷模。貨殖傳中留盛譽。耆英會上有名儒。糟糠不棄思鴻案。飢溺爲懷念俠圖。最是景堂留紀念。琳琅珍籍足清娛。

星明南極照華筵。人壽花開月正圓。樂善好施真俠士。含哺鼓腹卽神仙。急公屢見輸財勇。愛國無如建學先。豔說平山堂軼事。莘莘孺子樂陶然。不參政事異時髦。領袖東華品譽高。積散運施明至理。供求調燮表清操。計贏早歲張鵬翼。濟美他年紀鳳毛。餘慶高門興未艾。文章經國看兒曹。

國立中山大學校長戴傳賢副校長朱家驊

馮君當世豪。卓犖負奇氣。委書而服賈。欲救貧弱弊。志居陶朱陶。雅擅計然計。海槎初南遊。江艚復北駛。瞿塘溯西峽。吳淞極東滙。香島信外府。番禺大都市。

君從事其間。人和兼地利。端木億則中。樗里囊有智。
三倍利益贏。鉅萬富累致。素懷藏若虛。濟世好行惠。
善堂賑飢寒。醫院療瘡癩。公園資遊娛。學校增智慧。
大贖廈千間。文庫書萬筭。孝思景堂館。崇德孔聖會。
揮手百萬金。遊蹤九萬里。豈無車與裘。自奉惟簡易。
豈無金與珠。家風惟儉素。言行法前修。孝友爲家瑞。
我思君先人。驩也傳市義。後有大小君。賢惠如魯衛。
君克紹前芬。報國豈在位。積善宜降祥。芝蘭滿庭翠。
古稀晉高年。第祿俾昌熾。歌詩侑兕觥。兼以風當世。

愚弟陳濟棠

積善有餘慶。種德無虛穫。仁德魯論稱。斯言誠矩矱。
本此爲君祝。臚陳可約略。憶昔事壯游。衝霄起鵬鶚。
挾策走川渝。崎嶇歷邛笮。所至識陶朱。虛懷善酬酢。
賑荒米擲珠。好施金解橐。百架置圖書。萬卷闢樓閣。
興學徧四方。育材及村落。祇此教育資。七十萬非弱。
視彼斗筭人。無乃形慚怍。而公鳴其謙。自奉一何約。
宗祀費經營。親族謀康樂。對人無城府。將事必恭恪。
以此遂其生。精神如海鶴。哲嗣皆人龍。崢嶸露頭角。
擷此丹桂香。侑以無算爵。美意信延年。荀子語何確。

己巳保良局總理弟陳殿臣陳樹銘陳文宗高良和陳綺

雲夢遂初李尚銘余仕榮李濯祥區灌歟黃凱吉岑仲卿

生世不能爛六韜。整軍經武建干旄。猶當追蹤子范
子。牽車服賈展長技。清季以還久患貧。舉國酣嬉仍
未已。諸公密勿固不臧。吾儕迂疏尤可恥。惟有平山
馮先生。利用厚生有正軌。少隨季父適暹邦。握算持
籌善經紀。當年器宇實不凡。富人欲託以愛女。不貪
羅綺棄糟糠。磊落光明有如許。後從海外返珂鄉。殆
以卉服難廻翔。鼓勇溯江踰三峽。因在巴渝爲客商。
貿遷悉協計。然策供求相應無扞格。由是操奇復計
贏。貨幣纍纍成鉅額。束裝回粵隱市廛。敬恭桑梓亦

有年。挺身出任救荒事。泛舟糴粟義凜然。旋因遷地來香海。剛毅精神猶不改。方公視事本院時。謠誣紛紜良可慨。公獨因時以制宜。力持鎮定安闐闐。議將院款不輕提。家資作保慰儕輩。蓋公豪俠本少成。用能舉重有若輕。老謀畢竟能匡濟。幾歷艱危總不驚。他如興學育英才。以暨設館備圖籍。嘉言懿行尙孔多。未及一一臚其迹。公今正屆杖國年。懸弧又值蟾圓月。喆嗣跼斟延壽杯。洗腆承歡香醖醅。同人權攝院事宜。祝嘏無取作諛詞。積善餘慶有成說。敬推茲義作新詩。

己巳仲秋中浣東華醫院總理羅文錦何爾昌梁猷生梁
毓麟余焯生羅竹齋陳子衡馬詩傳馬爲媛何世奇郭雙

鰲莫達煊林表謀陳炳郭琳爽關溫伯

粵人善賈聞四方。北踰燕趙南至洋。自從歐美通商
後。踏徧五洲遊萬邦。平山先生年十五。志氣豪邁與
人殊。聖賢垂教貴力行。不肯咕嗶學腐儒。涉足褰裳
萬里遊。猶勝科場求一舉。少年辛苦走蠻荒。中年入
蜀溯大江。胸中具有經濟才。懋遷自足雄萬商。積資
千萬本非奇。有財無我成慷慨。富貴尊榮敝屣之。行
義行仁每不遑。捐資百萬豈其惜。但願貧得教育飢
得食。自來賢者每多勞。摩頂放踵無寧息。一人兼得

萬人才。一家庇得萬家邑。先生善賈豈多財。以義爲利利自開。忠信篤敬行蠻貊。立身多學古訓來。振商興學平生志。老來憂國心未衰。嘗聞仁者自多壽。人生七十古稀有。而今嶺表矍鑠翁。鬢如銀樽顏如酒。筵開八月蟾圓節。祝嘏晉觴邀牛斗。有子機雲并多才。仁人自克昌其後。會看期頤到百年。香山圖上認元首。

國立中山大學附屬小學主任莊澤宣暨教職員學生全體

馮公平山於民十二年以其令先祖旭芳先生名義捐助敝校經費六百五十元莘莘學子

迄今猶霑餘惠。民十八年。錢塘江潮生日。卽
公七秩生日大慶之辰。爰代表全校員生。綴長
歌一首奉呈。非計工拙。聊誌景仰而已。歌曰。

我讀孔伋言。大德必得壽。我繹穆子語。富爲善人有。
下士儻懷疑。試觀馮老叟。馮公豈不偉。陰德耳鳴久。
憶公三五少年時。萬里追隨季父走。商戰先富冒險
性。西隣遠至暹羅阜。暹有富家翁。羨公離羣醜。願飾
女兒花。側室奉箕帚。公顧已有糟糠妻。婉謝不爲紛
華誘。未幾返宗邦。入川權子母。富致鉅萬如鴟夷。利
專丹穴賽巴婦。從來富商賈。多財祇知守。獨公善積

亦善散。義舉惟恐後。興學捐資逾億萬。圖書設館搜
二酉。歐美歸來重文化。待我士林獨優厚。自餘慈善
大事業。興辦靡不仗公手。無怪凡百善機關。大名鼎
鼎列公首。今躋古稀年。兒頻獻壽酒。兩兒已入大學
之文科。貯看文章繼韓柳。一兒幼稚雖未學。亦解對
公戲綵開笑口。更看雪片似飛來。珠字錦篇堆左右。
不是公同事。便是公親友。縱然未識韓荊州。也被大
扣或小扣。共道陸地行仙富且仁。奇福微公那消受。
鰕生雖不才。諛詞向不苟。爲仰慈航渡蒼生。未酌大
斗祈黃耆。岡州南望太平山。願祝公如山上萬歲杻。

歲歲立德與立功。更祝公並太平之山齊不朽。

新會岡州中學校長李克強

耆英盛會集華堂。南極星臨萬丈光。棧樸菁莪培後學。仁漿義粟徧遐方。園林寄傲襟懷遠。詩禮傳家歲月長。藥校兼金承慷慨。桃觴同祝壽無疆。

廣東中醫藥專門學校董事會

盛德由來享大年。羨君高義薄雲天。圖書萬卷承先志。鬢宇千楹啟後賢。松柏長春彌茂盛。芝蘭挺秀正聯翩。月圓人壽韶光好。更祝期頤福澤縣。

廣東中醫藥專門學校全體教職員

馮平山先生七十壽言彙錄

一五五

七秩祥開八月時。千秋史載百篇詩。克家有子三鳴

鳳。子有丈夫爲國培才一足夔。獨力成學雍伯藍田生

有種。於好善性少陵廣廈庇多資。瓊筵接近團圓月。丹

桂香飄入酒卮。

慈善由來孰主持。季良豪俠舊曾知。蟠桃熟爛三千

歲。楊柳甘露一萬枝。濟衆卽今誰比數。識荆翻恨我

生遲。岡州共仰龍門大。婦孺知名滿口碑。

城西方便醫院同人陳惠普陸敬科黎月農徐蓉階巫景

勳簡月朋黎少伯莊省躬何戊南布秩臣李慶三黃載堂

郭仙舟陳卿雲羅嘯漱岑家禮梁耀垣麥慕仁溫侶魚何

子真陳詠南梁伯揚嚴禮初林達卿唐乙垣朱巨田李子

平凌清晨白玉書范少石何贊基陳信民陳振飛

馮公平山七秩壽辰。徵集詩文。獻頌必多。傑臣
行年九十開一。凡公平生舉辦公益事業。皆
親知確見。知其實事求是。良非純盜虛聲。不揣
庸耄。聊綴律詩二首。以爲之頌。

憶公初開湯餅會。我自堪爲座上賓。壯遊巴蜀隨無
力。惠濟災黎與感恩。幾處公園留遠跡。萬間廣廈庇
斯文。蓮開七朶籌無算。滿座稱觴笑語頻。

遐齡七十古常有。惟公德澤更長緜。蘭臺繡像稱三

立。慈院同聲頌二天。諸子同沾時雨化。香港大學成立，藉公贊

助十力尤多，傑現臣在十一男庶宗，皆曾在大學畢業，耆英不
讓樂天賢。鹿門喜見龐公在。海屋籌添享大年。

愚弟陳傑臣

積善從來福壽高。曲承親志羨兒曹。金蘭聯璧言殷佩。玉樹盈階範並陶。鄭忽辭婚忘勢大。細胡營業握財豪。慨捐鮑贈謀公益。翻笑錢奴拔一毛。

岡州耆彥古稀逢。創舉捐輸世可風。樂善同人師大舜。育才興學駕文翁。華僑有口碑皆頌。香海無波水自融。怪底箕疇天特錫。期頤更祝壽如松。

愚弟鄧志昂

長裾絳繚躋華堂。葡萄美酒稱瑤觴。主人舉杯還醉
客。客欲侑爵無文章。君年三五見頭角。逸足待騁跼
飛黃。書記姓名安足學。培風巨翼南溟翔。巴東三峽
巫峽長。估帆西指瀕青羌。赤甲白鹽恣所歷。黃精赤
箭盈青囊。良工醫國寓深意。詎唯賣藥同韓康。儲材
要備梁公籠。歸艗不僅蜀中薑。滔天橫流忽湯湯。學
海源枯文潮狂。君拾叢殘掃榛莽。大啟學舍收材良。
輔以圖書建以館。海濱鄒魯茲焉倡。餘事更及貧民
塾。保良團防殫劬勩。只今七十老彌劬。育才興學仍

皇皇。詩書澤長古有訓。厚報行見鍾諸郎。我聞老學如炳燭。衛武抑戒前史詳。喜君格言不離手。不欺之學師湘鄉。洪範五福首壽富。君尤好德兼康強。莘莘學子諮黃髮。英英哲嗣傳青箱。論交我自比羣紀。進頌但媿非班揚。上壽期頤理可券。次亦繼躅君家唐。

世愚弟岑伯銘拜撰通家弟溫肅書

南極星輝八月天。蟾宮預報祝耆年。君曰壽辰怡顏綵服聯三鳳。學令郎升入漢家三鳳介壽瑤觴會衆僊。鳩杖穩扶搯夏裔。鱣堂樂助育英賢。古稀恰屆身還健。白髮知交亦夙緣。

岡州歸立一靈光。七秩懸弧合舉觴。美意延年天獨厚。深仁煦物後繁昌。保存國粹文風振。君捐輸振興學校最力。不附時流儉德彰。君創儉德會。此次將賀禮悉充善舉。同事華顛娛晚景。弟與君同事營商業。尚餘幾人。好教頤養壽無疆。

弟杜四端率男其薰其成其餘香生香產香培香傳孫祖

奐祖欽祖庇祖佑祖惠祖顯祖良祖恭祖溫祖儉

服賈暹羅未展眉。不貪財色最爲奇。大江北上臨西蜀。正是生平得意時。熱心公益本天真。興學藏書識解新。七十萬金揮手去。香江一覽有何人。

君家新會屬西江。念念無忘父母邦。仗義疏財誰得似。一鄉善士也無雙。

從來作善降休祥。感應先知五世昌。二子潛心求漢學。保存國粹意深長。

廿載交遊是夙緣。讓君先達古稀年。懸弧適在中秋後。好上南山頌一篇。

愚弟周卓凡

始平家世本崇隆。匡海鍾靈半屬公。杖國艷躋從古重。全鄉澤庇與天同。性存孝友由髫齒。志具仁慈守寸衷。今日華堂齊祝嘏。松齡一什付詩筒。

開基勦業蜀川行。貨殖居然橐滿盈。興學始終勞擘
劃。賑荒遐邇竭精誠。四方多難皆懷德。九族蒙恩各
感情。仁者自然臻上壽。香江更孰與爭榮。

愚弟南海關方谷

杖國宏開誕節筵。萊衣舞處雜羣仙。精神應競金風
爽。福德還同碧月圓。珂里菁莪蒙惠澤。香江士庶仰
豪賢。華堂進頌無多語。但願兒孫世世傳。

愚弟黃鼎銘

奕奕精神侔潞國。羨公龜氣得來清。三槐手植欽能
繼。公有丈夫子三。伯仲現升。大樹胸懷讓不爭。大樹將軍

讓功公讓先世遺產洵足後先輝映。覽揆蟾宮飄桂子。爰開洛社會耆英。月圓花好應人壽。願祝長庚分外明。

秀毓岡州嶽降神。鵷行同列太平紳。古稀天錫公純嘏。博愛心存自近仁。殖貨畢生推鉅子。育材一樣逮貧民。公於盛鄉及本港設立貧民義學多所。弟亦聞風繼起。躋堂我獻南山頌。合契喬松不老春。

弟黃耀東

矍鑠精神杖國年。行同玉潔智珠圓。懋遷富軻渝州地。仗義名高赤柱天。芹藻流風閎教澤。枌榆孚信放糧船。前身自是光明月。纔過中秋敞壽筵。

區廉泉區紹初區朗軒區灌敷

古稀恰屆壽而康。作善由來降百祥。報本孝思隆祀
典。賑饑惠澤沛仁漿。藏書滿架琳瑯富。興學培才棫
樸良。美意延年先五福。躋堂羣祝慶無疆。

南極星輝蔚大觀。中天秋月恰團圓。芝蘭玉立盈階
秀。松柏清高耐歲寒。嘉會亭修詩興逸。圖書館築士
顏歡。吟成愧乏生花筆。聊借稱觴寫素紈。

鄉愚弟劉星昶

蟾圓嶽降兩當時。嘉會良辰際遇奇。如此清光如此
夜。可無旨酒可無詩。桃筵開處於斯盛。蕪句題來不

敢辭。頌獻南山慚筆拙。聊隨髦士祝期頤。
大德從來壽必膺。善人是富著儀型。卻婚志鄙糟糠
易。興學思培桃李榮。南越米船宏協助。東華金庫煞
經營。卽今寢廟園林勝。永篆鄉邦不朽名。
漆雕未仕自珍藏。端木才雄舞袖長。暹國遠征通貨
殖。川渝遄返利梯航。持身要旨廉能養。止足良箴佩
不忘。友愛天成資景仰。豈徒行表與言坊。
介眉纔到古稀年。人瑞昇平鶴算繇。綵戲斑衣環膝
下。觴稱冠蓋滿門前。僑邦官長紆車駕。祖國親朋進
頌言。柏道華堂開壽域。松齡經久節彌堅。

姪黃頌陶

最難人壽月圓時。况復籌添古所稀。圭嶺靈鍾知氣聚。白沙源接證心期。聰明早識生財道。友愛堪爲舉世師。我媿無文供善頌。祇憑桂酒祝期頤。興學餘閒復濟貧。如公想是佛前身。杜陵廣廈終何處。平仲高風仰古人。積德自增仁者壽。儲書還欲顯其親。卽看此日多家慶。應識當年有善因。

台山馬持隆

德邵年高溯始平。當時五老首耆英。今朝公亦躋榮壽。彈指期頤又洗觥。

遲地經營自少過。壯年轉入蜀川多。從茲貨殖盈千萬。此日齊賡天保歌。竭力仁慈衆所欽。賑荒興學仰淵襟。從來仁者稱耆壽。桑梓尤爲頌德愔。恰值蟾圓例有詩。徵文遠近付郵馳。華堂濟濟延賓客。祝嘏辭章獻介眉。

愚弟順德譚伯韶

海屋籌添樂事傳。羣賢晉祝啟華筵。壽由德致身彌健。福自天申節更堅。范蠡施財能得士。老彭好道不知年。蕭韶一曲新歌作。正是蟾光處處圓。

愚弟梁弼予

不貪富室贈奩優。甘與糟糠共白頭。始識田翁非大器。麥收便作易妻謀。

暹羅遊罷四川遊。棧道雲煙眼底收。飽吸峨眉清淑氣。丹田從此壽根留。

功同富弼賑飢民。噓氣成晷雨澤均。不待金來糧糗發。福星一路頌仁人。

詩詠菁莪貴樹人。揀時尤勝指困仁。海濱頓使成鄒魯。絃誦歌清洗俗塵。

積德由來享大年。綠睛炯炯地行仙。機雲競學萊衣

舞。玉樹臨風態度翩。

愚弟岑澤樵招頌侯

培養人材素主張。捐資興學夙願償。松柏常榮知勁節。芝蘭競秀吐芬芳。籌添海屋春彌永。德洽鄉閭後必昌。七秩延齡齊祝嘏。南山獻壽衆稱觴。

愚弟蔡興蔡昌蔡聰

桂香浮動蟾光透。月圓花好人長壽。南嶽仙翁開壽筵。衆仙同日霓裳奏。仙翁家住南海濱。厓山巉巖高入雲。毓靈拔秀山川氣。不鍾奇石鍾哲人。童年夙具鯤鵬志。乘風破浪凌雲氣。服賈重洋菽水供。經商萬

里寧辭頓。枳棘終難棲鳳鸞。一朝奮翅返家園。溯江
過漢渝三峽。棧閣褻斜暫息鞍。長卿豈是長貧賤。持
籌布策饒奇算。猗頓陶朱欲比肩。坐致千金何足羨。
昔年粵地歲阻饑。哀鴻遍野何連沓。賑糜共飽參軍
惠。散穀同沾僕射施。滿而不溢斯爲富。積財能散何
傷有。買貴香江五色絲。家家同把平原繡。羅書築館
富琳琅。育材興學揚國光。杜陵廣廈開千萬。天下寒
士皆庇藏。易云積善有餘慶。邦人共仰祥雲盛。三槐
五桂植前庭。玉樹瓊枝栽滿徑。惝恍久蔭洽肌膚。春
風夏雨多沾濡。年年但願逢斯日。共祝三多詠九如。

愚弟何爾昌率男禮全仁全忠全信全孝全孫貞潔

籌添海屋壽無疆。作善洵能集百祥。子美有詩憐士切。退之曾解挽瀾狂。道如明月秋彌皎。節比黃花晚更香。喜值從心初度日。蕃釐懋介祝方長。

世姪李尙銘

圖南早駕北溟魚。種子由來孕讀書。欲媲蘭臺蒐秘籍。恥教橫舍鞠園蔬。黃金祇許酬三樂。白髮何勞頌九如。正是月圓人壽節。葱葱佳氣溢門閭。

愚弟穎楚葉壽頤

綺席銀燈笑語稠。正逢桑落酒新蒭。鴻泥並座論青

眼。蘭玉盈階慰白頭。七秩華年思絳縣。二分明月似揚州。尊前試奏長生曲。巴蜀雲山記昔游。迢遞西風到海涯。井幹桐樹長孫枝。剛逢北海開尊日。正是南山上壽時。杖國精神真健者。服箱才調信高訾。而今淡漾金波好。又見蟾輪照玉池。

晚生李幼泉

徵取詩文祝大年。愧余譎陋意難宣。誼屬世交共閭里。聊綴俚詞入頌箋。人生古稀每蹒跚。羨公步履常健全。富貴康寧得天厚。優游勝似陸行仙。憶公少時抱大志。南涉暹羅西入川。握算居奇億屢中。才媿端

木薄計然。安富若素。自儉約。勇爲見義。慨投錢。桑邦
穗石留成績。館立圖書興學先。卜式助邊何足擬。黃
標紫標邁前賢。况復性生重孝友。分財析產置義田。
厚德從來能載福。今逢七秩開桃筵。登堂鞠脰介眉
壽。詩賡瓜瓞祝綿綿。

世姪鍾健生

蟾圓應候嶽生申。海屋籌添七十春。興學天應隆福
報。好施人羨率仙真。范家父子堪同德。田氏君臣詎
比倫。介壽筵開三鳳舞。我來頌上九如頻。

阜元行阮煥如阮俊侯

和藹如春大可親。丰姿鶴立見精神。陰成桃李根先
固。澤普粉榆惠已勻。管子通權多妙策。文翁興學有
傳人。團圓好月同真相。况又風流自出塵。
重洋遍歷倍開眉。壽相同瞻喜可知。桂影婆娑花放
後。梅梢馥郁月來時。家傳詩禮敦倫紀。館築圖書重
孝思。雛鳳威麟應竝譽。幼承庭訓自怡怡。

世愚弟簡伯卿

歸來閒與話滄洲。七策胸中豈足侯。一舸早從江海
遠。萬間還爲士夫謀。輸才卜式無慚愧。興學文翁可
匹儔。更羨平生多退抑。家風大樹正相侔。

共識天南郭令公。閒携玉杖趁秋風。庾樓月滿觴如海。蜀道年時氣似虹。桃熟正宜九老會。桂攀尤喜兩兒同。商量爲借生花筆。佳話新添比洛中。

宗愚姪潛勳煦勳漢勳祖勳時熙

威鳳祥麟百禩遭。持躬淡薄獨賢勞。不欺主義千秋法。博愛精神一代高。社會痼瘕常繫念。鄉邦桃李賴薰陶。九如詩頌松醪飲。榮壽欣逢興倍豪。

姪曾達觀

僊行陸地古稀年。耆德追蹤白樂天。發糶每頒棠邑粟。育才不吝水衡錢。釋家寶筏開生面。杖國儀型證

福緣。况復連枝丹桂馥。月圓人壽敞瓊筵。
問齡絳縣仰高超。管領秋光入酒瓢。仁義彌綸宏濟
幹。勛名卓著早扶搖。修翎齊美九苞鳳。衍祚蕃昌七
葉貂。華祝嵩呼人絡繹。來途不礙馬蹄驕。

香港順益號羅竹齋黃少平

年登杖國寶弧懸。福慧雙修證佛緣。藍玉盈畦勤種
德。黃金布地廣興賢。蟠桃獻瑞千秋節。蟾桂飄香八
月天。難得甯馨虔色養。萊衣應舞樂綿綿。
名齊魯殿蔚靈光。生長岡州姓氏芳。萬善積成仁者
壽。九如矧復熾而昌。功同大樹猶謙抑。秩媿莊椿永

健康。三鳳家聲門鼎盛。良辰競晉介眉觴。

香港立記行從吉世愚姪黃德權

古稀眉介謁華堂。先德聲譽徧梓鄉。今日徵詩賡杖
國。時年齊祝壽而康。

少壯經商赴暹城。翩翩展翮蜀川行。計然妙術精神
著。貨殖旋歌百室盈。

救荒興學兩堅心。跋涉艱難衆所欽。古訓昭垂仁者
壽。留徽像合鑄黃金。

始平家世溯千春。德邵年高代有人。此日公膺榮慶
典。蟾圓恰值是良辰。

南海關溫伯

月圓花好是何時。笑祝南山酒滿卮。此日稱觴齊介壽。當年平糶遍療飢。岡州惠澤千家佛。香海文宗一代師。我愧杖鄉頭已白。曾無片善起瘡痍。芳儀俊偉想翩翩。不向人間結俗緣。潞國康強欣此日。曲江風度記當年。松筠骨相秋逾健。雲鶴精神晚益堅。觴捧九霞多慶祝。酡顏有客醉華筵。

愚弟陳翼雲

圭峯挹翠接蒼穹。崖海灣環間氣鍾。從古英豪多踔越。至今靈秀毓吾公。吾公系出馮城後。大樹家風敦

素守。少壯棄儒事懋遷。南洋西蜀歷年久。權衡輕重
滿腰纏。遯跡香江養性天。大發仁慈宏偉願。捐輸義
舉累萬千。曾載麥舟濟嗷鴻。曾將家券拯金融。曾出
鉅貲興教育。莘莘學子被忻懽。餘如善事幾難悉。賑
濟輸財過萬億。如此豪懷有幾人。光昭嶺海咸矜式。
大德從茲享大年。斑斕萊綵舞堦前。擬趁崧生申甫
日。祝公杖國設華筵。公謂古稀亦爾爾。踵事增華非
所喜。果將桃獻杖頭錢。拯救芸芸事尤美。由是樂善
與人同。恩波廣被遍氓蒙。他人祝嘏稱家慶。我公介
壽羣呼嵩。君不見中山大學附設小學班。春秋絃誦

仰高山又不見港粵岡州各團體平原絲繡人懷惠
萬頭攢動祝千秋。子舍承歡莫與儔。紛紛裙屐稱觴
日。還比觀潮人更稠。元和志。浙江錢塘江口。每年八
潮。公於是日降生。故云。

香港中國銀行工商銀行和豐銀行

聚財容易散財難。數散黃金惠士寒。書度鄉嬛疑福
地。經研璧水助文瀾。爲仁得壽理如是。作善降祥心
自安。今值東坡生日。日笛歛李委此臚歡。

晚生羅少堂

弧懸八秩壽耆英。駟馬高門壯始平。仙島蟠桃歡宴

會將軍大樹舊家聲。秋澄玉宇蟾開鏡。酒熟瑤池兕
酌觥。得向階前稱揖客。登龍不羨李長庚。

南極連宵吐瑞光。桂花香裏此稱觴。祝釐喜趁觀濤
日。養志宏開戲綵堂。百歲遐齡文潞國。四朝榮譽郭
汾陽。永膺多福由天授。作善從來必降祥。

博施濟衆古人難。廣廈惟公大庇寒。學校育才蒙養
正。圖書益智士林歡。敬親尊祖稱仁孝。重義輕財見
膽肝。盛德在躬堪造命。何須金竈覓神丹。

高朋滿座列貂蟬。盛饌叨陪玳瑁筵。海屋添籌雲復
旦。豳風剝棗酒如泉。月圓花好娛初度。鳳翥鸞翔下

衆仙佇待期頤介。純嘏濡毫更頌萬斯年。

弟陳伯壇

香江介嘏此稱觴。履滿賓筵笏滿牀。蟾窟秋風皇覽
揆。兕觥春酒客躋堂。梨眉艾髮精神煥。蓬矢桑弧歲
月長。更羨鯉庭多樂趣。幾枝丹桂競芬芳。

桂花香裏過中秋。八秩歡添海屋籌。甲子遐齡論絳
縣。乾坤佳氣萃岡州。仁聲義聞范文正。碩德耆年陳
太邱。杖國杖朝腰腳健。如公福命幾生修。

大樹家聲振粵城。山川靈秀毓耆英。崧生嶽降逢初
度。祖德宗功紹始平。竇氏濟人家篤慶。韓康入市衆

知名蓬萊此日羣仙會。齊獻瓊芝壽玉京。
衢歌巷舞祝堯年。珠玉隨風樂九天。七字探驪劉夢
得。萬言倚馬李青蓮。黃鍾大呂行雲響。白雪陽春樂
府篇。我亦階前長揖客。新詩吟就寫瑤箋。

愚弟鄧義琴

嶺表羣材合鑄鎔。作人壽考辟雍鍾。三珠澤耀璇源
遠。一閣天然學海宗。范氏天卓氏經堂新食報。哲闕
乘芬世兄、現肄業香港大學中文學院、武林藏書錄、
仁和卓氏傳經堂藏書數萬卷、士林嚮風、科第入材、
蔚起一時、論者以爲詩書食報、文翁石室舊游蹤。公嘗入蜀、借將棫樸周
詩意。願祝遐齡似柏松。

莫衍鈞張懷萱

古岡間氣產英姿。七秩筵開慶及時。桂子香飄蟾報
喜。公曰壽長。蘭陔綵舞鳳來儀。好仁張載懷民物。興
學文翁樹矩規。我忝通家陪末座。應將象譯勉陳詞。
僕曾與令子姪所
究英文、忝居教席

南極光騰八月秋。羨公福慧幾生修。行仁不倦應增
壽。致富無驕孰與儔。喜看鳳毛輝五色。快擎兕爵醉
雙眸。從心所欲知純道。問歲同添海屋籌。

從吉通家晚生黃文徵

大樹名門福蔭留。菊泉人壽古岡州。十年教育能薰

德一室圖書集勝流。市隱真堪高義俠。里雄羞與競
嬉游。論交肝膽今餘幾。爲祝松齡結鶴儔。

香海優游不羨仙。德星報聚恰車懸。人依樾蔭涵仁
澤。天與椿齡廣善緣。九老冠圖唐白傅。一經詒穀漢
韋賢。白公提倡設
會時年七十君家重結耆英會。秋入弧辰月正

圓。耆英會原有
馮行己公

新會李揚芳

鬢齡曾赴暹羅遊。壯歲浮江願始酬。漢澣紀聞鸚鵡
賦。蜀都行色鷓鴣裘。名成苑蠡陶中市。歸臥元龍海
上樓。老去精神彌矍鑠。更從歐美駕輕舟。

興學標名徧邑都。藏書館閣壯規模。廣廈歡顏羅將相。橫經便腹席師儒。典墳稽竅中天制。山海流觀大地圖。藜杖火光四照。老人星並炯雲衢。

金籬金屋匪思存。名地名人並仰尊。卜式分財拚讓弟。齊姜非偶漫論婚。性安鳩拙題愚谷。趣悟鳶飛闢道園。桂樹恰同春樹茂。月輪香滿醉椒樽。

天錫梨眉富壽康。水成功德溢汪洋。米船指日輸陶侃。楮券權時質孟嘗。風定金鈴花活命。春回玉鼎藥流香。君家耆耆輝先後。會繼睢陽又洛陽。

新會何頌謨蔚霞

鐫碑有道兩山青。嘉會亭還養拙亭。小築誰爲風月

主。中秋交耀老人星。

公建嘉會亭於象山公園均碑記

西山挹爽入書臺。密邇泮池眼界開。大庇單寒成廣

廈。滿栽桃李十年來。

公辦新會城貧兒義塾十二年

楹書補貯小卿嬛。教澤長留二酉間。仁壽坊中留壽

域。合將載籍壽名山。

公在會城建景堂圖書館費十萬元奇

九畹滋蘭福蔭綿。高標人擬地行仙。他年海屋添籌

日。長盼秋蟾萬古圓。

公九兒女稱

新會李吉甫

紫水黃雲孕育優。天生耆碩冠時流。藏書早壯儒林

色服賈曾經蜀道游。星彩滿瞻高北斗。月圓恰趁祝
中秋。香江合作香山會。東海汪洋衍壽籌。

弟莫佩華

致富陶公厚蓄儲。川渝服賈遠牽車。景堂紀念懷先
德。宦海忘情卻聘書。米散賑荒嗷免雁。訓承市義食
無魚。稱觴繞膝誇三鳳。積善人家慶有餘。
熱心教育豈沽名。百萬金錢一擲輕。職業養成窮學
子。漢文尊重宿儒生。校營師範光羊石。館築圖書冠
蟹城。願上南山松柏頌。長留大樹蔭羣英。

新會白雲居士林郁如

馮平山先生七十壽言彙錄

一八九

恨未登堂捧紫霞。遙依南斗望星華。椿庭綵映恆春樹。桂苑醕添昨夜花。爭羨延齡踰杖國。况兼市義紹傳家。試看萬戶臺萊頌。碩德如公亦孔嘉。

英姿一鶴立雞羣。商戰雄才建遠勳。猿叫巴山聽夜雨。鵬搏溟海捲秋雲。佗城玉粒維民食。香海金莖靖市氛。怪底此翁洵矍鑠。壽由仁得古來聞。

一般桃李沐裁成。逖聽春風頌禱聲。廣廈歡顏酬夙願。奇書滿目惠羣英。星添南極無邊福。月到西筵分外明。玉宇瓊樓開壽域。人間天上共澄清。德邵年高耳目彰。不煩罄竹擅揄揚。薛家三鳳皆英

傑漢代雙魚盡吉祥。喜有延年留菊盞。愧無鉅製助
桃觴。臨風遙獻岡陵祝。蘭草陔南歲歲長。

愚弟陳文舉

僕素不喜作諛詞。惟先生力辦善舉。不吝百
數十萬金。富而能仁。世所罕見。茲以壽誕承徵
詩文。謹獻俚句以祝。

紫水黃雲舊釣遊。耆英蔚起古岡州。曾經滄海增新
識。幾度渝關善運籌。喜見壽星輝北斗。剛逢圓月祝
中秋。君家大樹千年物。種向人間福蔭稠。
錢愚財虜竟如何。豪舉如公最足多。鄴架圖書供博

雅。鄭僑鄉校起謳歌。治生不讓鴟夷子。施賑奚慚馬
伏波。幾顆蟠桃徵善果。樂觀萊綵舞婆娑。

愚弟何琴樵

君不見盆允靈峯出崑崙。蓬蓬佳氣鬱海濱。又不見
黃雲紫水產異人。往往鍾毓蔚奇珍。馮公應運氣獨
厚。異質天賦石麒麟。少小明慧且好學。貨殖才堪端
木倫。壯游漢蜀洵善賈。堂構相承克負薪。恬淡深得
養生術。香山九老追前塵。古來杖國知不少。年高德
薄何足論。今公存心體造物。推恩奚分越與秦。力決
西江活涸鮒。律吹黍谷立回春。慶應勸學攀諭吉。廣

設義塾濟貧民。圖書闢館濬學識。文化奚啻歐美鄰。
公園學校多善舉。管見慚難覩縷陳。大德得名宜得
壽。南極星光初度辰。堦庭粲粲三珠樹。萊衣舞綵稱
觴頻。祝公遐齡齊大椿。大裘廣廈普慈雲。

新會趙公謨

如是龍華大會天。金星南望正高懸。從心恰屆素王
日。序齒何疑絳老年。無事菊泉誇導引。對看桂月喜
團圓。由來耆壽關修德。試味箕疇五福篇。
持籌自運計然策。致富何須司密書。寢廟宏開見輦
鳥。公園遊樂及樵漁。教無畛域如家塾。堂貯縑緗擬

石渠。杜老不勞歌廣廈。菁莪棫樸定交譽。

興學興工重本源。豈徒善舉及鄉園。兒童絃誦喧羊石。商旅輿歌達虎門。輸粟也如汎舟役。儲金卻賴息
吮言。他年青史添佳傳。貨殖區區未足論。

陰德何人也盡知。天教生此好男兒。膠庠今日皆增

色。大小他年有頌詞。西漢馮野王與其弟聖卿相代
為太守吏民歌之曰大馮君小

馮君兄弟繼踵相因循聽明賢知惠吏爭看老萊紛

戲綵。又逢嘉樹茁連枝。金蘭聯璧叨持贈。合向西風

飛一卮。

人生五福壽居先。公更康寧齒德全。矍鑠眞如馬伏
波。導引不數葛稚川。富而好禮古所難。公獨仗義濟
時艱。賑恤未嘗分畛域。大名鼎鼎榜人間。古人寄迹
五湖中。千金三散未爲雄。興學輸財逾百萬。肯將美
譽讓陶公。館闢圖書仰景堂。紛陳鄴架滿琳琅。保全
國粹培文化。養育人材萃古岡。吉人爲善日不足。彼
蒼特錫長生福。留與桑梓作慈航。普渡貧兒宏教育。
嗟彼世間守財虜。銅山鑄就任銅臭。雖屬同登壽宇
人。碌碌庸庸何足數。良辰初度月還圓。合向蟾宮禮
衆仙。乞得姮娥不老藥。培植蘭桂濬心田。萬國酒家

綺筵開。無邊風月香江來。玉斝金樽同買醉。齊上南山壽一杯。緱嶺笙歌下九天。當頭南極星輝懸。照澈華堂人戲綵。稱觴歡賜杖頭錢。香山九老紹流風。耆英大會古今同。留得芳名傳萬載。此生勝作帝王躬。

創辦愛羣善院董事弟謝侶彝

中秋佳節後三天。光滿銀蟾祝大年。王謝芝蘭栽砌上。琳瑯書畫耀庭前。堂開畫錦盈車馬。會集耆英播管絃。花好月圓人並壽。香江艷說讌桃筵。主人愛客晚筵開。郭李仙儔笑語陪。北海豪情徧梁峻。南山獻頌詠萊臺。樂天嗜麴酣千斗。曼倩餐桃祝

一杯。大樹陰濃延壽宇。月明時節定重來。

愚弟何毓泉

見說中秋氣象新。馮公明月卽前身。七旬未倦商而學。萬口爭傳富且仁。秋日鶴籌添海屋。壯年鴻爪遍風塵。記曾教席偏詒我。祝壽借題話夙因。

平山義塾前任教員許雁池

七十遐齡矍鑠翁。今人殊有古人風。陶材就學書香遠。助麥泛舟義粟豐。陸地神仙腰腳健。萬家生佛口聲同。評松頌柏多佳詠。願逐萊衣祝華嵩。紫標黃榜足腰纏。不買良田買福田。古籍琳瑯資後

學。爾音金玉景前賢。且將席上三杯酒。散作人間萬
戶煙。幸託龍門隨杖履。祝花常好月常圓。

世愚姪陳照薇

平山世丈七十壽慶。家君淡愚命作壽詩。率成
俚句八首。祇就個人實事言之。以博一笑。

憶昔香江受學時。自慚弱冠始勝衣。登樓乍見蒙青
眼。一語銘心是可兒。

工會剛逢湧惡潮。暹羅歸棹正無聊。輪船買得新試
水。命我扶搖上吊橋。

後灘已過又前灘。自昔傳聞蜀道難。卅萬基金全附

托。每防打算誤通盤。

鼓輪因事赴春申。作客當然避早婚。爭奈阮郎強硬甚。爲儂介紹意中人。

自昔個人持主義。去秋才是結婚時。今秋長者嵩生日。恰是豚兒出世期。

會記老安與少懷。我剛添個小嬰孩。祝公壽比無量佛。豚犬再蒙爲絜提。

今年追溯十年前。未許郎君設壽筵。料得預知仁者壽。而今已達古稀年。

人家慶壽稱家慶。公爲圖書有夙緣。十二萬圓廿一

擲香江開館貯芸編。

世姪李子庚

已築景堂圖書館。又築平山小學堂。一擲金錢三十

萬。兩年先後解私囊。景堂爲亭上設有景堂公尊翁別號一尊

個人首把學堂開。公是岡州第一回。記得五年前畢

業。曾從母校受栽培。

貧兒失學最堪憐。義塾初開十二年。細數海濱鄒魯

地。生徒今已達三千。會城貧兒起義塾由先生發起開辦

腰纏十萬成何事。肯助中山大學堂。銅象也應留紀

念。平山堂外永留芳。廣州中大校內有平山堂石刻三字

白沙先生誠千古。名蹟更傳張象山。兩處公園經發起。築亭紀念作賢關。白沙象山兩座先生公園、築有嘉會亭、養拙亭、兩座、計費六七千金。課餘舊學要商量。我愛看書夏日長。仁壽坊留圖書館。祝公仁壽永無疆。景堂圖書館、在會城仁壽坊。

平山高小學校學生陳均陳平交李子就李國楨馮宜贊

歐陽龍等

將軍大樹本龍葱。又茁新枝興我公。花甲周餘今杖國。林壬并有合歌風。赤松自得靈長術。絳老翻教譽望隆。好德由來膺上壽。熙熙多處荷忻懽。善舉交稱遍市闔。經營商會濟時艱。祠聯南北欣諸

阮館貯圖書比西山。梓里公園添逸趣。杜陵廣廈庇
歡顏。樹人樹木慶兼舉。濟濟成材指顧間。
侘城惠及又香江。善院膠庠鼎力扛。粟任運輸普生
活。金融操縱靖紛咙。大名烜赫驚當道。衆望素孚及
友邦。行己律身老彌篤。謙和堅定卻無雙。
積善之家慶有餘。盈庭玉樹又瓊枝。飛騰庠序增新
色。光大門閭自有時。青史豈徒傳貨殖。班衣紛舞看
羣嬉。翩翩邢衛應嗤我。合向華堂進一卮。

制襟弟林叔文率男毓芬

稱觴祝嘏玉相陪。騎鹿麻姑晉酒來。三子象賢聯袂

立古稀能不笑顏開。

浙水觀潮應運生。圭峯銀海降耆英。阿蒙吳下開茅塞。卅載追隨老舅甥。

扶南破浪逐征塵。未許居停欲附姻。纔賦宜家齊舉案。故鄉還有倚閭人。

十年寄跡話巴山。萬里間關倦欲還。借問儻來成底事。北堂萱草鬢毛斑。

仁漿義粟本清糟。籌賑哀鴻大澤嗷。此日晶盤堆桂子。大家來獻武陵桃。

羣雌保障亦殊恩。冶葉辭條更莫論。援手便成新眷

屬。同聲爭羨好兒孫。

重重絳帳育英才。多賴栽成手腕來。到處絃歌聲不
斷。堂皇庠序萬間開。
教育由來謀普及。琳瑯鄴架又曹倉。此中大有平民
化。館列圖書紀景堂。

外甥李作新率男榮宗華宗光宗

作人壽考媿周詩。食教羣欽衆母慈。海嶠鴻施仁者
粟。辟雖雅化富能資。天彰一老豐華黍。月緝三秋頌
福茨。公德義聲尤足佩。象山碧玉故園思。

愚弟趙配獻

人生七十古來稀。惟有仁者可言壽。仰觀南極老人星。長此光輝數宇宙。壯哉此老羨馮公。晚節有如松柏茂。行年十五游暹京。追隨季父供奔走。及壯周流蜀漢間。譽滿商場誇領袖。積財好施師前哲。凡百公益心尤熱。菁莪造士興學堂。輸財內外無區別。平生尤酷嗜圖書。景堂建築揚先烈。積善之家慶有餘。風詩載詠絲瓜瓞。富貴禎祥與善人。歌興麟趾慶振振。棣萼交輝相競爽。善人獲福自天申。先生七秩壽而康。得天獨厚著謙光。蟾宮丹桂香飄候。月圓花好樂稱觴。有是德宜乎有是福。爲君歌麋壽之詩章。

愚弟蘇誠漢

佛氏慈悲儒者惠。降祥果報本同源。壽名必得由仁術。方便能行是善根。萬卷儲撐寒士腹。千金賚至大黌門。懸弧雖值中秋後。明月清宵侑一尊。

羅樂天

龍馬精神海鶴姿。壽筵開處仰龐眉。觀潮時節千家慶。杖國年華四境知。自是瑤堦齊戲綵。更無玉樹不交枝。最難嶺表恩波普。爲繡平原遍買絲。

心是如來骨是仙。鴻題留印滿南天。須知大樹家聲遠。得獲洪疇福澤緜。海屋籌還添七十。蟠桃子已結

三千年年秋色平分後。桂苑香飄。匝綵筵。

愚弟林天木

財雄猗頓富稱奇。况復生平好樂施。興學實行心似
火。頌聲載道口皆碑。蘭芬桂馥歡承膝。桃熟椒馨喜
介眉。正是古稀同上壽。登堂聯袂祝期頤。

世愚姪劉景初

南極瞻成象。他邦任策鳩。體仁行道篤。有福自多求。
吉日開桃酌。人添海屋籌。萊班慚附驥。華祝喜停騶。

晚生葉寶書

德高望重古稀年。等是蓬萊第一仙。芝草飽餐春自

在。梅花脩到月常圓。才全識備齊推首。實至名歸未

卸肩。憶否游旌過孟米。好將鴻雪證前緣。先生年前游歷歐美

入盛米埠鄞人修東道主之禮談敘之下相見恨晚忻喜無量

品自清高歲自繇。蟾光贏得映華筵。鱣魚協頌符三

傑。雛鳳蜚聲振九天。端闕三人購粟賑飢膺首出。輸

財興學解腰纏。花開益壽知無量。福占人間享大年。

世愚弟梁濬南

南方間氣鍾百粵。氣蘊岡州更蓬勃。秀靈薈萃良足珍。誕生碩彥無窮竭。始平世胄殊光榮。大樹將軍啟閱闕。我公器量復恢宏。仰承先德軻彌發。公自綺年

赴暹羅。追隨季父仍奔波。財色雙收亦謝絕。獨抱潛
德心無頗。既整歸裝入巴蜀。身履棧道攀巍峨。事業
克展慰良願。腰纏十萬非蹉跎。宅心仁愛行方便。惠
澤宏施恆普徧。義粟仁漿等發棠。飢民存活皆歡忭。
自粵而港同一心。急公樂義仁風扇。軍興影響到金
融。質存善款尤機變。維桑與梓應敬恭。倡辦義舉方
重重。商會成立賴實力。公園建設留芳蹤。亭榜養拙
與嘉會。獨肩鉅款殊從容。居鄉僑港兩得所。飲水思
源多景從。虛榮不驚彌高尚。志潔行芳得真相。勳名
輕視爛羊頭。區區顧問應謙讓。表彰先德誦清芬。圖

書闢館儕宗匠。天爵修兮人爵輕。典籍精華樂相餉。國家設學圖富強。努力倡助先珂鄉。男女義校若鼎足。孔聖中學尤提倡。香島貧民已受蔭。莘莘學子長毋忘。先後解囊數十萬。熱心教育誰頡頏。公更壯心赴歐美。跋涉重洋道如咫。調查商學熟能詳。樂與簡公東補君同行。同一揆。道經孟米喜流連。吾兄歡迓如倒屣。家兄濬南經商盛米修東道主之禮招待先生等暢敘之下大有相見恨晚之意投轄同盡東道情。感公稅駕真知己。攷察有得賦歸來。力扶商學聘長才。敬教勸學乃根本。誠貫金石心爲開。取長補短是急務。此行不負洵壯哉。年高望重且如此。

平昔興學應交推。庸俗起家賴父業。公乃達觀堪取
法。先世遺產奚足爭。篤於友愛羣情洽。律身行己懍
無欺。接物容人心匪狹。里鄙由來無間言。道貌可親
不可狎。祥麟雛鳳早蜚聲。蘭桂清芬滋發榮。春秋愈
高福愈厚。德蔭彌廣心彌傾。儲積陰德遺孫子。孫子
食福無能名。明德之後達人出。髻年綺歲先崢嶸。老
人星現輝香島。年屆古稀尤有道。梅花修到月長圓。
芝草餐來春不老。蟾光恰好照華筵。玉杯齊舉金樽
倒。我喜躋堂祝九如。景仰明公同四皓。

世愚弟南海梁述南校華

華堂今日壽屏開。樂善爲懷有別裁。妙把虛糜移實用。肯教筵會費資財。勞工幸獲仁帡蔭。學子咸沾德澤培。傳語富豪當效此。羣情歌頌樂春臺。

愚弟梁兆南

好將明月證前身。壽相團圓自有真。何止晚來成大器。少年岐嶷已驚人。
桃李成陰有自來。廣推教育爲培才。莘莘學子皆歡喜。道德相高智識開。
館築圖書見孝思。九泉賢父自開眉。菁華薈萃多文富。萬卷儲藏讀破時。

慈善宏施是壽徵。門開方便啟雲初。飢民得免嗷嗷苦。且飽仁漿萬衆興。

質存善款燭幾先。維護金融兩面圓。如此忠心如此策。調劑盡善底安全。

歐美歸來識更高。稔知忠信涉波濤。多才遠邁談瀛客。湖海元龍氣象豪。

鶴算長綿拜壽星。光騰香島發新硯。添籌最愛中秋後。桂影婆娑月滿庭。

月圓花好壽筵開。大好秋光入酒杯。晉祝精神松柏健。學題篇什媿臺萊。

因返到西邊街述南學塾見家嚴喜賦、

世愚姪梁筱述

仁壽橋邊日月長。蘇學士句。蟾光圓滿恰稱觴。彼蒼眷顧償佳願。教育恢宏事業良。

盈庭蘭桂氣芬芳。仁壽橋邊日月長。歐美歸來春未老。善根彌固譽彌彰。

館築圖書念景堂。孝思純篤振人綱。品高學粹猶餘事。仁壽橋邊日月長。

世愚姪梁幼述

壯年嗜讀貨殖傳。晚歲勤培棧樸材。翻笑定菴三百萬。盡交名士箇中來。

二南雅化起睢麟。故劍難忘見性真。應有象賢能養志。三珠玉樹漸輪囷。皓首依然矍鑠容。半生輪舶憶匆匆。積而能散非豪語。經義紛紛早在胸。菊泉介壽畫堂開。漢印文鐫號樂哉。羣屐願陪佳子弟。稱觴虔祝頌臺萊。

世姪進學。能言。錫光。羅用。超諱。益芳。宋。衡。芝。字。棧。

南極星光照何遠。酌兕欣逢祝大椿。中外士女山斗仰。富而好施可當仁。興學育才尤慨助。是翁深意培莘莘。濟濟一堂齊獻壽。桂花開放不盡春。

景杏荷

仙翁自有長生術。白雪何妨鬢上霏。歲月不催仁者壽。人生到此古來稀。花明綺席銀蟾滿。桃熟瑤池青鳥飛。南極星垂光永在。庭前欣見老萊衣。

仁風惠雨灑心田。貴德須知尙貴年。鏡裏丰儀仍故我。人間福壽勝神仙。菊花開到晚來好。松柏生成老更堅。美景良辰同此夜。月華端只爲君圓。

愚世姪女周淑珍

富貴原來有夙因。幾生修到可通神。香江握算財源盛。海屋添籌壽域臻。大塊旣饒三萬日。滿堂還祝八千春。佇看蘭桂滋榮候。奕葉流芳不患貧。

泰源石叻庄

填詞

古來稀。南山東海壽。維祺天倫樂。芝蘭玉樹舞萊衣。
越南曾却聘。巴蜀善操奇。仰芳規。願百千爲壽。獻瓊
卮。千間廣廈。興學校。徧敷施。儲典籍。五洲文獻賴
維持。岡州追遠德。香海化來夷。祝期頤。更年年沈醉
碧瑤池。

詞寄壽翁覽裳

世姪李正平

馮平山先生七十壽言彙錄

聯語

合慈善教育爲一家。功在社會。
媿洛水香山之九老。壽祝期頤。

弟金曾澄

岡州自古鍾耆彥

秋月同輝見壽星

許崇清

好義輕財。善人是富。
延年美意。壽考維祺。

陳策

有德宜享高壽。

爲善能昌其身。

卓文那魯麟活雅倫

卓文 D. W. Tratum

那魯麟 E. A. C. North

活雅倫 J. R. Wood

幾度桑生。籌添滄海。

千年桃熟。筵設鈞天。

經亨利

經亨利 T. H. King

芝草靈生。戊日維吉。

桂花香滿。庚星長明。

愚弟羅文莊

棧樸作人躋杖國。
松喬祝嘏值觀潮。

陶履謙

陀移國中爲東坡壽。
安期島上現南極星。

歐陽駒

具慈善心原壽者相。
過中秋節開七秩筵。

王鐸聲

馮平山先生七十壽言彙錄

共羨古來稀。筵開七秩。
能以財濟物。譽重八廚。

何熾昌

興學育才。爲世所重。
好善積德。是壽之徵。

程天固

積善之家。必有餘慶。
資富能訓。惟以永年。

嚴博球

作善降祥。必有餘慶。

受天之祜。惟以永年。

通家弟區大典

積善有徵。載福綏厚。
長生無極。到老安榮。

愚弟區大原集易林句

門煦春和。天與厥福。
德蒸人瑞。世有令名。

里愚弟譚道隆

大富貴。亦壽考。
長子孫。宜侯王。

馮平山先生七十壽言彙錄

馮平山先生七十壽言彙錄

一一四

弟譚汝儉

不住布施。迴超名欲。
無量壽命。永葆性真。

愚弟陳恭受

善洽芝蘭。壽貞松柏。
德培桃李。福蔭粉榆。

東華醫院同人

化助菁莪。聖學未墜。
壽如松柏。詩言允符。

香港孔聖堂籌備處同人

從心所欲不踰矩。
資富能訓惟永年。

廣州總商會同人

衆善奉行仁者壽。
諸孤樂育老人慈。

廣州市公立孤兒教育院同人

敬教勸學。樂善好施。遠承大樹家風。共仰壽星登七
秩。僑寓香江。結交文院。最好桂花時節。同斟春酒祝千
秋。

文院同人

輔友以仁。團體喜聯鄒魯地。
祝君多福。介眉壽比太平山。

僑港新會商會同人

富商巨賈。類多囊積金錢。羨我公教育貧兒。冀能識
字做人。學款已糜三萬貫。
哲嗣誕生。也合筵開湯餅。記當日破除舊俗。撥作仁
漿義粟。愛羣曾助百千圓。

愛羣善院董事同人

月滿中天。星輝南極。

望隆香島。名重岡州。

愚弟郭少流唐溢川李葆葵馬持隆黃耀東莫幹生區廉
泉劉星昶周雁亭余道生關仲晃區紹初區朗軒盧仲雲

邛笮游蹤通貨殖。
白沙教澤蔭儒門。

弟梁士詒士訂

愛日舒長。芝蘭競秀。
仁風洋溢。桃李爭榮。

貝祖詒

大樹參天。萬間廣廈。

馮平山先生七十壽言彙錄

馮平山先生七十壽言彙錄

二二八

平湖八月七十奇峰。

愚弟羅戢臣

天寶物華。堂開五桂。
月圓人壽。庭慶三槐。

愚弟陳碧泉

揀蓄育才。天錫純嘏。
律身應事。胸有格言。

愚弟簡孔昭

大俠可師。菁莪被澤。
盛德自壽。松柏挺姿。

愚弟郭靖堂偕姪焯南

既好義又好仁。作善降祥。天祐靈椿長不老。
歷杖鄉而杖國。稱觴介壽。我逢盛會祝無疆。

愚弟黃馨山

七十曰老。載在禮經。數洪範箕疇。富壽康寧兼好德。
八千爲秋。見於莊子。誦毛詩天保。岡陵松柏又如山。

世愚姪周煥年

與家君本屬摯交。早知作善降祥。仁者自應登上壽。
有哲嗣專精漢學。試讀豳風魯頌。古詩最好祝長春。

世愚姪周煥年鴻年

馮平山先生七十壽言彙錄

望重香江。德施自普。
名高粵嶠。壽考維祺。

香港永順和萬福盛何爾昌譚夢南

善與人交。我懷高誼。
好行其德。天錫遐齡。

愚弟郭仙洲黃次屏鄧星三黃春生

桂有叢香。筵開三祝。
松多壽色。詩頌九如。

世愚姪曾雄心率男南強永強日強

相與疑年參絳縣。

德綏多福備箕疇。

世姪陳冠卿偕弟兄階良烈良勳良樵良鰲良熙良庶良
燕良庶良羔黍屬世好有喜當賀謹獻百福壽圖以爲奉
觴之助順邑玉翰呂恭巽書

瑤池桃熟三千歲。
海屋籌添九十秋。

劉文藻

澤被鬢官德瞻大樹。
籌添海屋會慶蟠桃。

黃雲蔚

周百鹿壺吉祥壽考。

馮平山先生七十壽言彙錄

漢雙魚洗。富貴侯王。

劉子平陸蔭高劉百端劉叔莊

洪範之九五福曰壽。
大椿以八千歲爲秋。

弟陳伯壇

杖國華年。商場碩望。
輕財重學。嶺表耆英。

愚弟徐煥文借男湛星亮星源星權星朗星

有子克家。鳳毛濟美。
行年杖國。鶴算添籌。

愚弟陳儉堂

平山先生。樂善好施。對圖書館事業。尤具熱心。去歲捐資千元。倡辦本館。今歲七秩。懸弧慶辰。復捐萬有文庫一千種。嘉惠士林。促進文化。厥功甚偉。書此以伸慶祝。

一千元捐助經費。一千種惠贈圖書。教育爲懷。架滿琳琅資博覽。

七十載卓著信誠。七十萬廣行慈善。聲名盈耳。籌添海屋祝遐齡。

香港華商總會圖書館職員李明若莫國樑湯銘鈞

馮平山先生七十壽言彙錄

一一三三二

信同季布。義若希文。駿惠蔭鄉邦。遐邇齊聲歌日月。
富比陶朱。壽如百里。鴻名揚中外。朋儕羣願頌岡陵。

深水埔雪廠公司

惟行仁獲報。惟積善降庥。此日北海稱觴。繞膝芝蘭
同競秀。

是嶺海耆英。是岡州碩彥。今朝南山獻壽。華堂松柏
喜常青。

大新公司同人

公爲商董。當然有發言權。堅持義塾。頻開。令多數僑
童。個個讀書能刻苦。

我做教員。豈敢專謀飯碗。渴望盛筵再啟。祝無量壽
佛。年年把酒共聯歡。

香港新會商會義塾教員李載伯黃炳文李瑞華

壽宇閔開。今日介眉同慶祝。
華堂再造。去年著手爲經營。

祥興建造公司余松

玉宇無塵。璧月映延年寶籙。
銀河耀彩。羅雲環介壽華堂。

聚德隆

人生七十。算是古稀年。記會杖策揚鞭。將及半球。如

我兩人誠老壯。

壽祝八千。認爲無稽語。想到乘車戴笠。相逢晚景。願君多壽永提攜。

七十一歲老友李淡愚敬上手杖并題聯語爲賀

記我公作逍遙遊。曾向蓬門來舊雨。
命兒輩歌將進酒。好從香國祝長春。

弟陳樹梅率男贊垣贊弼贊展贊威孫冠芳冠時

聖人富於德。商人富於財。以德役財。是商中聖。
智者壽一身。仁者壽一世。留身濟世。既智且仁。

積善之家。不獨得名兼得壽。
從心所欲。最難爲富又爲仁。

惠陽陳履諳拜撰并書

文翁化蜀。學校宏開。興教仿前賢。煦育春風。多士歡
顏。徠廣廈。
范蠡處陶。積居致富。散貲稱好德。涵濡甘露。萬人翹
首祝長天。

愚弟呂興仁

不惜私財。力謀公益。
既延廣譽。宜享高年。

馮平山先生七十壽言彙錄

二二七

弟與 公知交四十餘年、素仰樂善興學、爲粵港鄉梓造

福、茲逢 公七秩榮慶、謹獻蕪詞、以誌慶典、 邑人大澤

李宇

市隱挹清風。譜一曲唐山。儘陶寫東壁圖書。南陽車
騎。
耆英欽盛會。沛八功德水。合贏得歲星永耀。秋月同
圓。

弟李賢濤率男沛欽等

衆沾德澤。
庶祝遐齡。

玲新公司 普安銀號 朱滉裘等

黻舍司鐸。秘閣司藏。慚我十年承付託。
酌兕有詩。介麋有頌。祝公七秩到期頤。

鄉愚姪李明若

廣廈大裘。顏歡寒士。
月圓花好。壽昌老人。

鄉愚姪李載伯

鐵齒金牙。壽算無極。
紫芝朱草。和氣長生。

愚姪潘永隆

七秩祝遐齡。行義有同張季直。

馮平山先生七十壽言彙錄

百年謀大計。當仁不讓葉澄衷。

後學莫琴海

天下有達尊三。故大德必得其壽。
君子之所教五。惟仁者以財發身。

鄉愚姪何家銘

會看貨殖傳青史。
遂欲年齡埒素王。

新會劉慎

盲目未盲心。五內已銘尊長賜。
是德宜是福。同聲預祝耄期年。

新會盲兒校長關如暉

有令德宜享遐齡。快看大樹長榮。把酒預期八千歲。
惟善人肯謀公益。值得香江紀念。購書又費十萬金。

互助學校全體員生

惠我士林。圖書四壁。

祝公晚景。壽考百年。

馮氏景堂圖書館職員李儀可李緝光等

大椿慶祝八千歲。

小草栽培二百人。

新會平山高小學校前任校長李淡愚職員李明若等

馮平山先生七十壽言彙錄

創義塾已歷十年。化雨羣沾。常有三百人受學。
開壽筵剛逢七秩。春暉未艾。更懸八千歲爲期。

新會平山義塾職員李淡愚莫浣卿何郁泉率學生三千
人

大樹好遮陰。許作木人。乃得謀生能度日。
小材蒙錄用。忝充校長。也隨學子祝延齡。

馮氏職業學校校長從姪朝樑

大樹家風與圖書并重。
善人壽相仰齒德俱尊。

陳錫鑒率男潔持正持僭姪兆文子材

利物濟人非市義。
怡神養性合延年。

愚弟李錦濤李若唐

勵學鑄才多文爲富。
月圓人壽美意延年。

愚弟林煥如

受爵傳觴尤懷多福。
頤性養壽永獲嘉祥。

弟袁蕙蘭

不朽有三譽駿四方賡棫樸。

馮平山先生七十壽言彙錄

馮平山先生七十壽言彙錄

二四四

大齊決百。登龍羣彥。頌臺萊。

世愚姪林毅伯

棧樸化行。爲善知本。
桂蘭香滿。介壽稱觴。

世愚姪杜其章

明我俊民。資富能訓。
錫公純嘏。俾壽而康。

世愚姪潘智航潘恩愷

樂育爲懷。萬流景仰。
期頤預祝。今日肇基。

黎萬機李光維

平山世伯。生平樂善好施。量宏胞與。尤以捐財興學。獨具眼光。本月中浣。欣逢七秩大慶。恭則必壽。信而有徵。爰貢壽聯。以爲觴介。

壽相無邊。桂影留香逢七秩。
德緣有大。仁風揚煦祝三多。

世姪區述一可

鶴算長綿。德隆梓里。
鴻猷卓著。名重香江。

世愚姪梁宗迪

馮平山先生七十壽言彙錄

二四五

俾壽而富。俾昌而熾。
如月之恆。如日之升。

晚生容兆焯

平山先生。眷錫純嘏。人頌厚仁。綵舞東階。筵開
西序。大家高唱。九如百祿之章。不醉無歸。一石
千鍾之酌。式燕且喜。歡記斯來。

椿算添籌仁壽祜。
萊衣舞綵桂蘭芳。

弟吳麗邨

與先生雖無一半面之緣。只因惜寡憐貧。料得家君

能結草。

在小子既受數十金之贈。多謝仁翁善長。喜隨王母
晉蟠桃。

王父吳鐵梅齋孫耀垣謹隨 王母及弟妹等

平山先生以十數萬金。建設景堂圖書館於我
邑。我輩得以瀏覽羣書。嘉惠士林。致足紀述。今
七秩壽辰。書此誌慶。

開卷有益。讀書便佳。得先生圖籍珍藏。四壁琳瑯供
博覽。

富而能仁。修德獲福。令我輩馨香上祝。千秋事業待

完成。

景堂圖書館閱書後學何焯堅

作善降百祥。玉砌芝蘭栽柏道。
中秋後三日。香江風月醉桃筵。

景堂圖書館閱書人余國忠

窮措嗜讀。每苦無書。自從館設景堂。圖籍公開。居然
爲我置書三萬卷。
富翁好仁。合當得壽。况復塾倡平義。貧寒受益。更願
祝君增壽八千秋。

景堂圖書館閱書者鄭髡貽

廣植良材興實業。
羣依大樹祝遐齡。

新會馮氏職業學校學生何祖然李榮燦梁極天馮社榮
等

馮平山先生七十壽言彙錄

壽。

永安公司郭泉郭樂杜澤文

壽。

馬祿臣王子傳馬超奇

大學曰。唯仁人爲能愛人。夫愛人莫大於助人。以得自愛之知識及能力。所謂愛人以德者是也。教育之宗旨。亦不外是耳。先生素來熱心贊助教育事業。可謂深知愛人之道。而有仁者之行矣。今日慶逢七秩之辰。特綴數言以爲壽。

仁者壽。

晚黃新彥

仁者壽。

程雪門

平山先生善人也。余等忝居西席。夙欽懋德。茲值先生七秩壽辰。謹上頌言。藉伸慶祝。

仁者壽。

黃燕庭李劍如

仁者壽。

鍾維新

資富能訓。與福相迎。添籌無量。積善有徵。

馮平山先生七十壽言彙錄

二五三

平山先生、齒德駿驥、桂蘭芳馥、南陔綵綯、北海樽傾、盥頌升恆、永留歡喜、時己巳中秋後三辰、養中學校張若梅、

壽宇長庇。

新會馮氏義塾學生丁巳年李鑣等一百二十人戊午年陳剛毅等一百四十人己未年黃百成等二百一十人庚申年屈煜欽等二百七十人辛酉年張棟樑等二百七十人壬戌年莫祖澤等二百一十人癸亥年余啓昌等二百一十人甲子年黎強耀等二百一十人乙丑年林日暖等二百二十人丙寅年黎錫霖等二百四十人丁卯年林根龍等三百二十人戊辰年伍鴻燦等三百二十人己巳年李華法等三百二十人

壽。

聚大莊開發莊

附錄

馮平山先生七秩榮壽徵文啟

鼎彝歲月。龍紋仰百斛之尊。松柏精神。鱗印孕千年之厚。恭則必壽。丹書著其箴銘。壽本諸仁。素王垂于典論。懿昔松喬結契。期類齊年。大都健法天行。德符地載。庶克貞至誠于金石。鏗斂寒霜。完真性于孩提。神凝秋水。然而東閣序說。則麥邱之祝。紀于漢觚。北海箋詩。則公堂之躋。介于豳籥。古來祝嘏。類上頌詞。而况濟嘯道真。澹養靈素。有是德者。有是福。全夫人者。全夫天。如我平山先生者乎。先生岡州碩彥。

嶺海耆英。家法受自鯉庭。儒書寶其鴻訓。少成若性。古道克敦。初棄毛錐。遂商卉服。時寓暹富人。欲以女爲其側室。並授遺資鉅萬。公以親命婉却之。牽車牛以作賈。愛日光陰。鄙糟糠之易妻。浮雲富貴。未幾歸從暹阜。貿易川渝。笮馬旄牛。雲路歷褒斜之棧。池魚澤藪。水程縮蜀漢之津。都會所在。貨殖自豐。故能抗禮秦皇。巴婦清利。專丹穴。通商蜀道。何細胡富擬白圭也。夫善人是富。穆子固有名言。而積財好施。范蠡亦垂至訓。時光緒乙巳。吾粵米荒。善堂舉公赴港購米。米下船而款未到。人信公而船先行。是則

庇樾雖賴仁人。發棠非無義士。然全琮倘忘急難。米船空還。堯夫不識見機。麥舟曷付。旣而移居港地。歷充東華醫院保良局首總理。團防局紳董。大學永遠監理。太平紳士。民國二年。兼理東華醫院財政。是時內地變故。金融恐慌。醫院付款。提之則大局動搖。不提則羣疑交集。公仍儲之銀號。利率務使增加。保以家資。謠詠因而寢息。杜季良豪俠好義。異地傾心。文潞國精鍊貫穿。外人拱手。以公方之。洵無愧色。君子將營宮室。宗廟爲先。士夫經理國家。鄉邦尤重。公于甲辰之歲。承先人遺訓。捐資特建祚祥祖祠。

礮石藏主。考制度于摯虞。植柏庀堂。襲規模于龔勝。卒使翬飛鳥革。南山增寢廟之華。甫柏徠松。東魯頌闕宮之恤。四時于焉觀禮。九族得以型仁。迨民國八年。新會港僑。欲組商會。然籌款匪易。告成遂難。公則捐資提倡。理財精密。咄嗟立辦。規畫咸宜。合散沙而成團體。社結枌榆。卽異域以訂同心。親聯桑梓。鄉里稱善。公之謂歟。凡茲美舉。罄竹難書。要其指歸。育材是亟。稽其在邑城興學。則設貧民義塾。平山學校。職業學校。及建景堂圖書館。購置圖籍。其助廣州興學。則捐高師附屬小學建築費。其在香港興學。則

設男女義塾外。又以港地小學。多本我國舊制。畢業而後。升學無從。乃特組孔聖會中學。兼貫中西。俾資升級。本苦心而集事。尤精力之過人。既又捐助香港大學堂費。書樓購書費。而邑中象山公園之養拙亭。白沙公園之嘉會亭。其建築費皆以一身任之。計其前後所辦義舉。約捐出六七十萬元。而學務所需。尤居多數。蓋始則裁吾黨之狂簡。次則成斯士之譽髦。繼則免後學爲通材。終復保名勝以觀德。開萬間之廣廈。寒士歡顏。羅四部之宏編。儒林生色。猗歟盛矣。雖然。公致富有術。而自奉則廉。經商甚勞。而好學。

不倦。故其持身也。則以儉德爲可師。其處世也。又以格言爲至寶。顏氏家訓。志止足之一篇。趙普讀書。手論語之半部。此真資富能訓。惟以永年積善之家。必有餘慶。宜乎喆嗣秉華秉芬等。均畢業漢文中學。旋考入大學漢文科。機雲競爽。擅門地于髫年。郊祁齊名。邁家風于綺歲。極人間之盛事。爲世上之美談。今年八月。爲先生七袞壽辰。攬揆肇生。恰應蟾圓之候。延鰲慶祝。應歌麋壽之章。所望藝苑儒宗。文壇詞伯。奏鐃吹之朱鷺。補笙詩之白華。珊架抽毫。筆擅徐陵之體。玳筵驚座。句攜謝朓之吟。編入奚囊。堂

懸畫錦。庶使觴咏之會。遠過蘭亭。耆艾之祥。遍知菊水。則赤城霞彩。錦標添四照之花。絳縣雲初。璫笈寶十行之草。伏祈 惠我。曷任歧余。

馮平山先生事略

馮平山先生朝安。廣東新會縣人。以商業起家。生平樂善好施。尤熱心捐財興學。近世言慈善者。必稱馮先生。先生固篤志力行君子人也。少讀書於家。能自立。年十五。棄儒業商。從其季父之暹羅。既壯。有室。其地有賈人某。見先生貌俊偉。許爲大器。欲以其女爲先生妾。并指其產鉅萬治匱具。先生婉

詞謝之。清光緒癸未。丁外艱歸。服闋。以暹羅商業。未足發展所長。乃北溯大江。過武漢。踰三峽。以入巴蜀。每臆供求相劑之理。爲化居懋遷之道。以此屢有贏蓄。光緒壬辰。先生在省城任方便醫院及各善堂董事。乙巳歲大歉。愛育善堂及各善院紳董舉辦平糶。衆推先生赴港購米。及期。金不至。米商鑒先生誠篤。先與米。不卽索值。飢民得以存活者甚衆。後居香港。每率先興辦慈善事業。連被選爲東華醫院首總理及顧問。保良局首總理。團防局紳董。太平紳士。香港大學堂永遠監理員等職。初。先生總東華

醫院時。值癸丑軍興。香港金融。蒙其影響。醫院有積存之資十數萬金。貯於銀號。衆議卽須提取。先生謂院董皆殷富。動關商場觀聽。一提存款。必羣起相繼。銀業益滋紊亂。乃以其產業文據爲質。保不提金。銀市卒賴以安。自是益爲當地人士所推重。每舉辦公益。必請曰。微先生孰與成之。先生亦勇於任事。往往以一人之力。成衆人累年謀議莫就之舉。其本籍白沙公園象山公園之建築。旅港新會商會之成立。多賴先生之力勩成之。廣東政府當軸聞先生名。屢欲聘爲顧問。先生自謂不習爲政。均不

受命。先生少時好學。業已爲商。無暇及此。旣致巨產。乃一意倡辦教育事業。於其邑城。則創立貧民義塾。職業學校。小學校。及景堂圖書館。於香港則立男女義學凡三校。復約同志組織孔聖會中學。香港華商總會圖書館。其輸財而不親其事者。於廣東高等師範附屬小學校建築費。香港大學堂基本金。閱書樓購書費。漢文大學經費。皆出鉅資。慷慨相助。而以景堂圖書館爲紀念其先人者。經營尤大。景堂其先德字也。計先後用於教育之資。凡六七十萬金。其歲捐零星小款。尙不與焉。民國十三年甲子。先生游

於歐美考察商業。旁及教育。既歸。見吾國教育設備。辦理多不如人。益務興辦教育。不遺餘力。蓋其年愈高。識愈定。而憂國之心愈熾。教育爲興國之本。宜其不能一日去諸懷而樂爲之倡也。先生少在外。而篤於友愛。自其少時。於先世遺產。未嘗過問。嘗曰。人能於分占財物時。視爲父母多生幾子。於有事出資時。視爲父母祇生己身。則必無爭執。又謂處世爲人。第一不可欺人。第二不爲人欺。又以古人格言。乃積學經驗之語。辦事不暇讀書者。當取而常觀之。以增進道德。見金蘭生先生所輯格言聯璧一書。喜其簡

要。恆記誦其語。以爲行事之則。故其遇事堅定。與人謙和。置紛華於不聞。處富厚若大素。律身行己。老而彌篤。視宿儒碩彥。不多讓焉。先生元配李夫人。生一子汝材而夫人卒。先生不忍再娶。數年。乃納李氏女爲庶室。生子汝槐。旣而汝槐汝材相繼早卒。戚友咸敦勸之。乃再納衆室鄭氏。李旋連舉二丈夫子。鄭亦舉一丈夫子。卽喆嗣秉華秉芬秉芹也。女子子六人。皆庶出。秉芹尙幼。秉華秉芬同肄業於香港大學中文學院。計先生生平周恤族黨。興學立教。矜存鰥寡孤獨貧無告者。與辦公益慈善之蹟事甚

蹟。先生有施人勿念之意。未嘗舉以語人。戚友知其事者雖多。終莫能詳盡也。今年秋八月十八日。爲先生七十壽辰。其公子秉華等將稱觴爲慶。先生戒其勿鋪張。而戚友又已爲之共謀祝嘏之方法。旣詳矣。壽臣等與先生交有年。略舉其行事之卓著者。以俟撰詩文爲先生壽者得考覽焉。

李右泉

黃維玉

區大原

羅蕙棠

趙超凡

周壽臣

金曾澄

溫肅

岑光樾

羅文錦

羅旭蘇

朱兆莘

賴際熙

陳垣伯

陳殿臣

曹善允

李亦梅

區大典

李景康

簡東浦

同啟

馮平山先生七秩榮壽受禮知啟

平山先生。樂善好施。生平建樹宏偉。於捐資助學。尤彰彰在人耳目。本年夏歷八月十八日。爲先生七十壽辰。其子姪輩迭請稱觴獻壽。均未獲命。迺謀之親友。求所以爲先生慶而勿拂其意者。僉以爲先生生平實事求是。推其所以不允子姪輩之請者。無非謂親友致賀。糜費多人貲財。勦助一家私慶。事可以已耳。夫禮言事親。奉養無方。然則人子之欲娛其親者。固不限於一方也。因擬略變俗例。舉行慶典。凡親友相愛。除以文字爲壽。自應珍存外。其屏帳器

物及一切珍饈致賀者。請勿糜費購辦。卽以賀禮之
值。齋交香港亦安銀號代收。主人如禮拜領。銘感盛
意。將來悉數捐助慈善事業。旣得 先生實事求是
之意。又普 諸公善與人同之量。似此辦法。頗爲適
當。詢之高明。亦以爲事尙可行。且稽之史乘。有以賞
賜金帛。賙恤者。有以餽遺器物散施者。師古賢之意。
以伸其孝養。亦理之所應爾也。爰略述原委。以告
先生親友之慶祝者。

李淡愚

陳照薇

麥慕仁

何爾昌

莫浣卿

郭仙洲

黃次屏

鄺子明

同啟

敬領戚友隆禮撥捐各慈善機關一覽

家嚴今歲七十壽辰。乘華等屢請稱觴上壽。均未獲命。後謀之親友。僉謂家嚴之意。無非謂糜財以慶於家。不如節費以益於衆。若親友之致賀者。除文字外。悉請代以賀儀。將來集得總數。概撥作慈善事業之用。事當可行。乃以此議復再申請。家嚴以此舉頗如其意。遂未阻止。然仍力戒勿事鋪張。以節物力爲詞。乘華等謹將拜領所得。屬於器物者。按其價格略爲估計。約值三千元。屬於賀儀者。則核計共一千八百一十三元八角。復由家嚴之意。於賀儀之數。

特酌加兩倍有奇。共四千一百八十六元二角。合計共九千元。并承家嚴命。按照下列辦法分配。撥送各慈善機關。既感戚友樂善好施之心。復順家嚴實事求是之旨。爰將該款分配於後。

陝甘豫旱災

着二千元

宜昌廣東醫院

着三百元

香港東華東院

着二千元

廣州方便醫院

着一千二百元

廣州貧民教養院

着一千元

江門四邑明善醫院

着五百元

馮平山先生七十壽言彙錄

二七二

新會城監獄工藝所

着一千元

新會城愛羣善院

着五百元

新會城仁安醫院

着五百元

馮

秉芬
秉華
秉芹

敬啟

中華民國三十年六月廿九日

贈 送



勘誤表

九六	九五	九三	九二	八七	八〇	七八	七〇	六七	六三	六二	六〇	五〇	四七	四六	四五	四二	二六	二〇	二〇	一八	一六	一〇	頁數	
八七	八八	四四	七七	一五	一六	一四	一五	一四	一五	一十	一十	一十	一十	一四	一六	一七	一五	一七	一三	一三	一七	一七	行數	
德澤○	浮聲聲聲	斑氏傑銘	指置千緡	先人	窈窕	堂字宏軒	猶雁信仰	通商運埠	義粟仁漿	呂公少女	機翔祐集	於是	麟騰風漿	尙藥與溢	而藥與溢	施藥賑粥	怡值仲秋	賢選	盤對	江汜不歇	返旆粵城	弘高載贊	助其建興	誤

○(應刪去)

九六	九五	九三	九二	八七	八〇	七八	七〇	六七	六三	六二	六〇	五〇	四七	四六	四五	四二	二六	二〇	二〇	一八	一六	一〇	頁數	
八七	八八	四四	七七	一五	一六	一四	一五	一四	一五	一十	一十	一十	一十	一四	一六	一七	一五	一七	一三	一三	一七	一七	行數	
德澤○	玉聲聲聲	斑衣傑銘	指置千緡	先民	窈窕	堂字宏軒	猶雁信仰	通商運埠	義粟仁漿	呂公少女	機翔祐集	於時	麟騰風漿	尙藥與溢	而藥與溢	施藥賑粥	怡值仲秋	賢選	盤對	江汜不歇	返旆粵城	弘高載贊	助其建興	正

二五九	二三八	二二三	二二一	二〇四	一九九	一八七	一七五	一七一	一六八	一五六	一五九	一四九	一三七	一三六	一二九	一〇九	一〇七	一〇五	一〇一	九九	九八	頁數		
八	三	八	一	二	七	六	九	二	十	七	四	九	七	一	九	八	五	一	一	六	五	行數		
免後學	李宇	譚道隆	睡麟	栽成	契提	春樹茂	翰才	渝三峽	蕭韶	譚伯韶	酒尼	懷散	賢選	改弦更張	馮文錯	傳頌古今	吳仲興	氣氤	白沙園圮	游緝	桂飄香樹	厥念相莊	嗜才若命	誤

二五九	二三八	二二三	二二一	二〇四	一九九	一八七	一七五	一七一	一六八	一五六	一五九	一四九	一三七	一三六	一二九	一〇九	一〇七	一〇五	一〇一	九九	九八	頁數		
八	三	八	一	二	七	六	九	二	十	七	四	九	七	一	九	八	五	一	一	六	五	行數		
免後學	李宇皆	譚道隆	睡麟	栽成	契提	椿樹茂	翰財	渝三峽	蕭韶	談伯韶	酒尼	懷散	賢選	改弦更張	何文錯	傳誦古今	吳仲興	氣氤	白沙園圮	游緝	香飄香樹	念厥相莊	愛才若命	正

